

ASO LULU, 19 OKETOPA 2022

Na nofoia e le Fofoga Fetalai le Nofoa i le itula e 9:30 i le taeao.

Tatalo.

FOFOGA FETALAI: Ou te faasilasila atu ua toe amatalia nei Taulumaga a le Fono Aoao Faitulafono.

Ia foi pea le viiga ma le faamanu i le Atua i lenei taeao i Lona alofa ma Lona agalelei, ua mafai ai ona maleifua mai i le lagi e mama ma le manuia le paia o le Palemene.

I le afio o lau Afioga i le Taitai o le Malo lau Afioga i le Tamaitai Palemia, afio lau Afioga i le Sui Palemia, afifio le paia i Minisita o le Kapeneta faapea foi Afioga i Minisita Lagolago.

Afio lau Afioga i le Sui Taitai o le Itu Agai ma le mamalu o sui usufono o le Palemene. Ou te ofo alofa ma faatalofa atu i lenei taeao i le soifua manuia ma lo outou lagi e mama.

E faatalofa atu foi i Ofisa Sili o Pulega o Matagaluega ma Faalapotopotoga Tumaoti a lo tatou Malo ua faatasi mai mo tatou taulumaga i lenei taeao. Malo le soifua manuia.

E i ai foi le manatu o lo o manuia si o tatou atunuu i ona tafa e fia, i lau Afioga i Le Ao Mamalu o le Malo ma lau Masiofo, lau Afioga i le Sui o le Fono a Sui Tofia ma lou Faletua, le Faamasino Sili ma le mamalu o le Faamasinoga, Faauluuluga o Ekalesia Kerisiano uma i le atunuu, o le aufaigaluega tofofi o le talalelei. E faatalofa atu lau Palemene i lenei taeao i lo outou soifua manuia ma le lagi e mama.

Le alofaiva o le Maota i lenei taeao, ia i ai le agalelei o le Alii. Manuia le usugafono a le tatou Maota, manuia le tapuai mai a lo tatou atunuu.

TULAFONO TAU FAAOFI O TEUTEUGA O LE TULAFONO O LE PULEGA O TAULAGA 2022 – faitauga muamua

FOFOGA FETALAI: Ou te tapa lau Afioga i le Minisita mo Galuega, Felauaiga ma Atinae Eseese, Hon Olo Fiti Afoa Vaai.

Tofa Hon OLO FITI AFOA VAAI (Minisita mo Galuega, Felauaiga ma Atinae Eseese): Lau Afioga i le Fofoga Fetalai e manatu o lea ua maea

ona e toto le taamu teevao i le tuaoi i le tatou mafutaga ma le tatou galuega i lenei aso, ua tatou molimauina Lona matagofie ma Lona mamalu i lenei taeao ua taitai mai ai lo outou soifua ma so matou ola foi. Ia ma o lea foi ua tatou toe poto moli i futiafu e tasi i le faaauauina o le tatou galuega i lenei aso.

E faatalofa atu foi i lau Afioga, faatalofa atu foi i le Taitai o le Malo, o le Afioga i le Sui Palemia, le Aiga Kapeneta. E faapea foi ona faatalofa atu i lena Itu o le Malu i lau Afioga i le Sui Taitai, ia o Sui Sinia foi o le Maota ma le mamalu lautele o sui usufono mamalu o le Palemene.

Ia e faapena foi ona ou faatalofa atu i le paia maualuga o si o tatou atunuu i so o se tafa o lenei lalolagi i la outou tapuaiga aua le alofaiva o le tatou Palemene i ona tiute ma faiva.

Lau Afioga i le Fofoga Fetalai, ua ou tulai atu ma le faaaloalo e faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Pulega o Taulaga 2022 i lona faitauga muamua.*

Faaluaina e le Sui Palemia ma le Minisita mo Pisinisi, Alamanuia ma Leipa.

Na faamaonia le lafo ma faitauina le Tulafono Tau Faaofi o Teuteuga o le Tulafono o le Pulega o Taulaga 2022 i lona faitauga muamua.

FOFOGA FETALAI: E talu ai ua ou taulimaina nei le Tusi Faamaonia o le Tulaga Faanatinati ua maea ona sainia e le Taitai o le Maota i lenei Tulafono Tau Faaofi, o lea o le a sagai atu loa le Fono Aoa mo le faitauga faalua ma faagasolo ai lava seia faitauina faatolu.

TULAFONO TAU FAAOFI O TEUTEUGA O LE TULAFONO O LE PULEGA O TAULAGA 2022 – faitauga faalua

FOFOGA FETALAI: Tulai mai lau Afioga i le Minisita o Galuega, Felauaiga ma Atina'e Eseese.

Tofa Hon OLO FITI AFOA VAAI: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Pulega o Taulaga 2022 i lona faitauga faalua ma ou te fia tautala faamalamalama i ai.*

Faaluaina e le Sui Palemia ma le Minisita mo Pisinisi, Alamanuia ma Leipa.

FOFOGA FETALAI: Tulai mai lau Afioga i le Minisita mo Galuega, Felauaiga ma Atina'e Eeseese, mo lau saunoaga faamalamalama.

Tofa Hon OLO FITI AFOA VAAI: Lau Afioga i le Fofoga Fetalai, faafetai mo le avanoa e tau toe faalateleina ai le faamalamalamaina o lenei Tulafono. o lenei foi Tulafono o se Tulafono laitiiti ma malamalama lelei, ma ua manino foi i ai lau Afioga ma le Maota nei i le tatou faasoia i le aso sa tatou soalaupule ai ma faifai ai le tofa ma le uta i le aso Gafua i le tatou Pre-Sitting.

Ae na o si vaega lava lea lau Afioga i le Fofoga Fetalai e faapuupuu atu se matou tala, ona o le tulaga aafia o le mamalu o le atunuu ina ia manino ma malamalama lelei, aemaise lava le feoaiga lea i le va o Mulifanua ma Salelologa, ia manino le tulaga e pei ona toe faataoto ai le Tulafono lenei.

Lau Afioga i le Fofoga Fetalai ma le mamalu o le Maota o le taimi nei, e 2 uafu o lo o pulea nei e le tatou Kamupani Vaa a Samoa po o le Samoa Shipping Corporations, ae 3 uafu o lo o i lalo o le vaaiga a le Pulega o Uafu ma Taulaga. A matau mai lau Afioga, e pei e le o taoto lelei le Pulega e vaaia tulaga ia a le tatou Malo.

O le suiga la lenei lau Afioga i le Fofoga Fetalai sa faia i le 2014, ona agai mai lava lea o le puleaina o nei mea lava o uafu ma ua i ai le talitonuga o le tatou Faigamalo, e ao ma tataua ona toe faafoi lava ia tulaga ia i lalo o matafaioi, e tusa ai ma Tulafono a le tatou lava atunuu, aemaise Tulafono faava o malo ina ia manino ma malamalama uma tulaga faapena. Mo le silafia e lau Afioga ma le mamalu o le Maota ia le fesuaiga lea sa faia i le tausaga e 2014, ia, ona ua malomaloa foi le gasegase o le tatou Pulega lea o Uafu ma Taulaga, lea la sa toe fai ai fesuaiga nei ina ia fesoasoani i lea itutino o le tatou Malo, ona sa i ai si faaletonu.

I lenei la taimi i le tilotilo a le tatou Malo, o lea ua tulai mai ua manuia le gasegase, ma o le a toe tuu atu loa ana ia matafaioi i le tauaveina o mea lava nei o uafu.

Ia, e le gata i lenei lau Afioga i le Fofoga Fetalai, o mea nei tau uafu, e le limataitaiina i lalo o Tulafono faava o Malo. Afai nei o le a agai mai se vaa i totonu, e muamua lava fesiligia e se kamupani vaa le latou vaa e agai mai, po ua i ai nisi e agavaa lelei, aemaise foi la, po o savalia Tulafono faava o Malo. Na outou silasila ananafi lau Afioga i le Fofoga Fetalai na outou molimauina ananafi le agai mai, sa i ai le tatou meli tele lava lea sa i le uafu i Matautu. Ia, faasolo atu ai lea o taeao le isi meli, o le vaiaso foi lea le isi meli. E i ai mafuaaga na. Aua e siaki muamua mai lava e kamupani vaa po ua taoto lelei le faiga o Tulafono a lea atunuu ma lea atunuu. O lea la e i ai le tulaga lea, ma o le a atili ai ona agai mai vaatetele ia laupasese i le tatou atunuu, ona o lea ua toe taoto lelei fuafuaga a le tatou Malo e tauala ma limataitaiina i Tulafono faava o Malo.

Ia, o le tulaga la lena ua i ai le tatou fuafuaga lenei. Ou te iloa foi o lea na umi lava si au faamalamalama i le aso Gafua i le tatou Pre-Sitting, ia ou te talitonu lava ua leai foi ni fesili. Ae a i ai ni fesili, ia, ou te iloa ai foi le sui e matua lava lana tofa ma lona atamai pe a faapea e toe fesili. Ma le faaaloalo.

FOFOGA FETALAI: Faamalo faafetai saunoa i lau Afioga i le Minisita, o lea foi ua manino ma malamalama lau saunoaga e faatatau i le Tulafono Tau Faaofi. Ia o lea foi sa tatou i ai uma i le tatou mafutaga i le aso Gafua, o lea foi sa auiliili foi saunoaga a lau Afioga e tusa o lenei Tulafono.

Ia, ae ua i ai le mnanatu o le avanoa lenei o le tatou Maota, po o ai e fia tulai e fia saunoa.

Tofa Hon Lauofo Fonotoe Nuafesili Pierre Lauofo (Anoamaa 2): Lau Afioga i le Fofoga Fetalai...

FOFOGA FETALAI: Ia, o lea ua matau atu o lea ua tulai mai lau Afioga i le Sui Taitai o le Itu Agai.

Tofa Hon LAUOFO FONOTOE NUA FESILI PIERRE LAUOFO: Ioe, e manatu o le a ou tamua ia i lenei taeao fou. E ofo alofa atu i lau Afioga. E faatalofa atu i lau Afioga i le Fofoga Fetalai faapea foi le Afioga i le Taitai o le Malo, le Afioga i le Palemia ma le Kapeneta, Afioga i Minisita Lagolago i lena Itu o le Malu, faapea foi Afioga i sui usufono mamalu o lenei Itu o le Maota.

Ua faamalo faafetai. E muai sulaina paia o le lagi i lenei taeao, aua lava le tatou va tapuia ma le tatou Matai Sili i le lagi e faapena ona faamanuia mai i le tatou galuega i lenei aso.

Le paia foi o le atunuu, e manatu o le a le toe afea i se matou gagana, o lea ua taoto a o se alaoo. A o lea foi e matau atu i le tatou Pepa o Galuega, e foliga mai na o le pau lea o le tatou galuega o le aso lenei, na o le Tulafono Tau Faaofi a le Afioga i le Minisita ia Olo.

Ia, o le a amata atu nai mataupu ia e fia maua ai se faamaninoga mai lau Afioga e tusa ai ma lenei foi Tulafono Tau Faaofi taua. E pei lava ona maua e lau saunoaga faamalamalama, o uafu lea i Salelologa ma le uafu lea i Mulifanua, ia sa i lalo lava o le Pulega o Uafu, po o le tausaga e 2004 lea sa faasee ai loa i lalo o le Faalapotopotoga o Vaa po o le Samoa Shipping Corporation, ona o le tau faatulagaina ma le tau faavasegaina o mea o seleni, aua lava le agaga maualuga sa i ai i lena vaitau ia faalelei uafu ma nofoaga, e faapea foi le auaunaga a le aufaigaluega. O lea la ua alu alu o lea foi la ua toe pei ona e saunoa ua taoto i se tulaga lelei, o lea foi la ua toe i ai le fesuiaiga e pei ona tulai mai. Ia o aga lava ia masani e fetuutuunai lava i lea taimi i lea taimi po o le a le mea e talafeagai, o le mea e sili ona lelei, aemaise

lava auaunaga faapenei mo le tautuaina o le mamalu o le atunuu. E momoli atu ai le faafetai foi i lea vaega.

Ia e pei ona saunoa lau Afioga, ona e eseese ituaiga uafu, o uafu faava o Malo, ia ma uafu la ia i totonu lava o le atunuu, mo mea o international ports ma mea o domestic ports. O uafu la ia e i ai le uafu i Matautu, e pei ona e saunoa, ia e tele lava, pei o le uafu faava o Malo lea a tatou, e tele lava mea o feagaiga faava o Malo o lo o aiaia ai foi le faagaoioiga ma le faaogaina o uafu ia ina ia talia lelei ma faamalieina latou po o kamupani tetele po o isi atunuu e i ai vaa o lo o fia malaga mai i Samoa, aemaise lava la a tatou vaa lauolua lea o lo o aumaia le oloa taumafa, aemaise lava oloa taumafa ma oloa faufale i totonu o le atunuu.

Ia, o lea la ua matau atu atonu o le agaga foi lea o lo o tau agai i ai se manatu o lau Afioga, ina ia siitia le tulaga o uafu ia i Mulifanua ma Salelologa i se tulaga mauuluga e pei o le uafu i Apia. E i ai se taimi o le lumanai. Afai o le tulaga lea e aveva ma uafu faava o Malo, e aoga foi i nisi ituaiga vaa, ia, o mea lelei uma mea na. Po o ni vaa fagota po o mea o vaa faila foi ia e feofeoai nei, ia o mea uma na e maua ai tupe a le atunuu e fesoasoani i le tatou tamaoaiga, aemaise lenei vaitaimi o lo o pagatia le tulaga o le tamaoaiga o lo o i ai, aemaise lava i mea tau seleni.

O lea la e mafua ai se tilotilo atu i le vaega lea. E momoli atu ai la le faafetai pe afai o le tulaga lea o lo o agai i ai se mafaufauga a le Matagaluega ma le Pulega. A o fesuaiga foi faapea, e masani ona tulai mai ai le vaea eseina o tagata faigaluega. Aua o le mea e masani ona tupu, a tuufaatasi loa ni kamupani se 2 po o ni falefaigaluega se 2, lona uiga o le a i ai le tulaga e tulai mai, ua toa-2, toa-3 tagata e faatinoa le galuega e tasi ona maua ai loa lea o le tulaga lena ua toatele tele le aufaigaluega.

Ae faafetai i lau Afioga o lea ua aumai faatulafonoina, e leai se au vaea. O lona uiga o se tala leo lelei foi lea mo le aufaigaluega, o se tala leo malie foi lea mo le latou faafogafoga mai, o le a leai se au vaea. Lona uiga, o le a tumau pea. A o mea e masani ai i mea faapea, e masani lava ona tulai mai tulaga faapena. O mea la na e masani ona aiaia i lalo o mea o faiga faavae a le pulega o Kamupani, ia po o le Pulega. A o lea ua vaai atu o lea ua aumai faatulafono, ia o le mea sili ona lelei lena, o lea ua i ai le security of employment mo latou o lo o galulue ai i le taimi nei, o le a leai se au vaea.

O le tulaga lea pei ona saunoa lau Afioga ma aumai i le Tulafono Tau Faaofi, e tumau aitalafu, e tumau pea ona totogi e le Faalapotopotoga aitalafu, ae o le a faasee atu meatotino po o aseta i le Pulega. O lona uiga e toe faasee atu i le uafu.

O le fesili la i lau Afioga i le Minisita, aua o tulaga faapea masani, o mea o aitalafu e faamau i luga o fanua ma aseta. Po o faapefea la ona faatulai mai le tulaga lea o le faasee o aseta a le Pulega, a o la e faamau ai aitalafu ia e togitogi i i e le Faalapotopotoga, aua o tulaga masani na, aua afai e nono mai tupe ma fai aitalafu, ona faatino lea ma resitala mea ia o mokesi o fanua. Ia

pei e foliga mai la o lea o le a faasee i o aseta ia e i ai mokesi, ae togitogi atu i i aitalafu. A o le tulaga foi e masani ai, e le mafai ona faamatuu atu aseta ae le i aveesea mokesi.

O lea la e mafua ai le fesili i lena foi vaega i se faamaninoga a lau Afioga i le tulaga lea o le togitogi o aitalafu i i i le Faalapotopotoga ae faasee aseta i o, a o lea e mau ai i luga mokesi o aitalafu nei.

O le mataupu mulimuli e fia paia i le tautalaga, o le tatou Tulafono Autu e i ai pepa ia faamalamalama na aumai e lau Afioga ma le Matagaluega, o lo o aumai ai i totonu o le Tulafono Autu le faamatalaga faale-Tulafono o le fanua lea e i ai le uafu, le legal description o le fanua la e i totonu o le Tulafono Autu. A o le Tulafono Toe Teuteu lea ua aumai, o lea na o se faaupuga fai mai o le a faamatuu atu le aseta, ae le o aumaia la i i le faamatalaga o le fanua, e pei o tulaga masani ina ia manino po o le a le fanua a o le tele o le fanua. Aua o lea e matau atu i lalo o le Tulafono Autu, e freehold, pe umia saoloto le fanua lea e i le uafu, le uafu lea i Mulifanua. O lea la e aumai i se tulaga lea ou te vaai atu ai, pei e le o manino la, aua o mea masani, o mea masani faapea e tatau ona faamanino, aua ia manino le tele o le fanua, manino tuaoi. Ae pe o i ai se faaletonu i tuaoi? O i ai se finauga i tuaoi o le fanua lea? Tasi lea fesili i lau Afioga i le Minisita, o i ai se faafinauga o i ai ua mafua ai ua le aumai maoti le faamatalaga o le fanua i totonu o le Tulafono Teuteu a o la e taoto i totonu o le Tulafono Autu.

O le vaega lea e fia avatu ai ma fia maua mai se faamaninoga mai lau Afioga i le Minisita i lena taeao. A o le faamoemoe o le Matagaluega ma le Pulega ma le tulaga ua i ai lou finagalo, ia ua manaia. Malo faafetai. Faafetai, na pau lena o nai fesili. Ae manuia le Fono.

FOFOGA FETALAI: Malo faafetai. Malo mo le faaso, ae lelei lava le fai ma tali e vave ai foi. Ia saunoa lau Afioga i le Minisita.

Tofa Hon Olo Fiti Afoa Vaai: Faafetai. Ua ou vave tulai atu ne i te i toe fesiligia foi vaega taua ia pei ona saunoa i ai le Taitai o le Itu Agai.

O le tulaga ia o aitalafu, o le vaega lea sa oo uma i ai sailiiliga ma feutagai ai foi ma talatalanoa ai vaega ia e lua o Pulega o Uafu ma taulaga faapena foi Pulega o tatou vaa. Ou te fiafia e faasilasila atu, e toe ave uma lava uafu agai i lalo o le SPA, e leai ma se aitalafu o i ai a le tatou Kamupani Vaa, e leai foi se aitalafu o faamau i se aseta ia ua toe avatu i o i le tatou Pulega o Uafu ma Taulaga. O le faamalamalamaga la lena i le tulaga lea. E pei ona ou fai atu, sa oooo uma i ai sailiiliga i vaega ia pe faapefea ona fai le fesuaiga lea. Ina ua manino la tulaga uma ua leai ma ni aitalafu, ia ona faapena foi lea ona faasee na o aseta. E tai pei foi o le mea lea sa faatino i le 2016, sa tulaga i mea o aseta na ave, ia o mea foi ia o mea uma lava a le tatou Malo, e i i faasee i o toe faasee mai.

I le tulaga o fanua, ia e faapena foi. Ma o lo o i ai lava le faatalanoaina o fanua nei, atonu e i ai se taimi ona faamanino atu lea i luma o le tatou Palemene.

O le isi vaega lea na saunoa i ai le Afioga foi i le Taitai o le Itu Agai i le tulaga lea o fesuiaiga. Ina ua taunuu mai le tatou Faigamalo lenei, sa tilotilo totoa lava le tatou Faigamalo i le taofia lea o le faiga lea. A faapea ua faaletonu lea pito ua faasee i le isi pito pe faasee i le isi pito. Ua silasila le tatou Faigamalo, saili tonu po o le a le faafitauli ona fai lea i ai o le fofo. O lea la ua i ai le fofo i le taimi lenei, leaga e le i mafai ona fofo i le taimi lena. Ae manatua foi lau Afioga i le Fofoga Fetalai ma le mamalu o le Maota, o faiga faavae ma faiga a so o se Faigamalo i ituaiga Corporation po o pisinisi foi ia, e leai lava se faiga e fai e tulai mai ai se faaletonu. A o le faaletonu, o le faataunuuina o le faatinoga o le galuega. Ia atonu la sa faaletonu i lena taimi, a o le taimi lenei, ia ou te molimau atu le galulue foi a Afioga i Faaluuluga o Pulega ia e 2, ia o lea ua malolosi. Ua alu lava le Pulega latou o lea ua saosao le faatinoina o galuega. Aua o le mea lava lena o lea e tulai mai, e lelei a tatou fuafuaga, ae a faatino loa ua faaletonu.

E momoli ai lau faafetai tele i Ofisa Sili o Pulega taitasi ia, o lea ua tulai mai. E faamalulu atu i lau Afioga i le Minisita o le MPE, ona sa e fesiligia le tulaga lea o se tatou dividend, toetiiti lava oo mai le isi, faavagavaga lau ato, toetiiti oo mai le faamanuiaga i lau Afioga.

E saolele lau Afioga i le Taitai o le Itu Agai i le tulaga lea o Tulafono ma le faiga o tatou International Port, Uafu, o lea foi ua i ai le fuafuaga a le tatou Malo i le tulaga o le tau saili foi lea po o fea lea o le a faatu ai se isi tatou international port e backup ai le tatou uafu e tasi lea e i ai, ina ne i toe tulai mai ni faafitauli, a o la e i ai le avanoa.

Ia pei o le... E faamaonia lau Afioga o tatou tagata faigaluega e leai se isi o aveesea mai lea faiga fou, na o le transfer atoa lava o tagata faigaluega na galulue i lalo o le isi Pulega, ia, e leai se mea o faaletonu ai le latou auunaga ia ma latou faamanuiaga foi e ala i a latou galuega o lo o tautua ai. Ma le faaaloalo.

Tofa Hon Lauofo Fonotoe Nuafesili Pierre Lauofo: Faafetai lau Afioga.

FOFOGA FETALAI: Ia, se i toe tulai mai po o i ai se mea o totoe o lau...

Tofa Hon Lauofo Fonotoe Nuafesili Pierre Lauofo: Ia e leai, na o se fesili lea e toe fia malamalama atili ai i le mataupu lava lea sa saunoa i ai le Minisita.

FOFOGA FETALAI: Saunoa mai.

Tofa Hon Laufo Fonotoe Nuafesili Pierre Laufo: Faafetai atu i lau Afioga i le Minisita i le saunoaga e faamalamalama ai nai mataupu sa ou laga. Ae toe pau lava lea o lau fesili, ona o lea na e saunoa, ua leai ma se aitalafu, leai ma se aitalafu o totoe. A o lea e fai mai le Tulafono, o aitalafu ma tulaga uma, e tumau pea i i le Faalapotopotoga. O a la aitalafu lea e talanoa mai ai le Tulafono o lea o le a togitogi pea e le Faalapotopotoga? Ma lou faaloalo.

FOFOGA FETALAI: Tulai mai le Minisita.

Tofa Hon Olo Fiti Afoa Vaai: Faafetai mo le faafesili. O le faaupuga lava ia lena faale-Tulafono...

FOFOGA FETALAI: Se i tulai mai lau Afioga i le Palemia.

Afioga Hon Fiamē Naomi Mataafa (Palemia): Lau Afioga i le Fofoga Fetalai, o se mea e fia malamalama ai. E taua le felafolafoaiga i luga o le Tulafono. Ae na o le pau lava le mea, pei o le talanoaga a le Minisita ma le Sui Taitai, e pei ua tatou o i le vaega foi lea o le auiliili. E pei o le tulaga lena o lea ua tatou oo i ai.

FOFOGA FETALAI: Atonu o lea ua maua mai le agaga o le tulai mai o le Afioga i le Palemia.

Tofa Hon Olo Fiti Afoa Vaai: Ia o le a faapuupuu atu ia sau tali i le Afioga i le Sui Taitai. O le faiga lava ia o faiga o Tulafono, e tataua lava ona i ai ni faaupuga foi ia, ina ne i i ai se mea faapena. Aua a na le tuua i ai le Tulafono lea ae i ai ni aitalafu, ia e le mafai foi ona avea mea ia ma tulaga faapena. O le Afioga foi i le Sui Taitai o le susuga i le alii loia e malamalama lelei i le faiga o mea faapea. Ae o le a le afaina, ta malolo ia.

Tofa Hon Laufo Fonotoe Nuafesili Pierre Laufo: Leai ou te tulai atu lava e momoli atu le faafetai mo le tali, ae o lona uiga la o le tali sao lava, o la e i ai a nai aitalafu, ia pe masalo foi o i ai nai aitalafu ae le faapea ua matua leai ni aitalafu, ia ona taua lea o le tulafono. Ae faafetai.

FOFOGA FETALAI: Ia, o le saunoaga a le Minisita o le saunoaga faaiua lena. Ae ou te fesoasoani atu foi i le mea lea na faafesili ai le Sui Taitai, o le Vaega lea e 17(A) lea sa i ai i le Tulafono Autu, o lea ua repeal i le Tulafono lea tatou te talanoaina nei, mo le silafia e lau Afioga i le Sui Taitai lea vaega.

Tofa Hon Laufo Fonotoe Nuafesili Pierre Laufo: Ia faafetai mo le fesoasoani lau Afioga.

FOFOGA FETALAI: E ao foi ona fesoasoani atu. O lea ua ou vaai atu ua tulai mai le sui usufono mo Faasaleleaga 5, tulai mai lau Afioga.

Afioga PESETA VAIFOU TEVAGAENA (Faasaleleaga 5): E momoli atu le faafetai tele i lau Afioga mo le avanoa o lenei sui usufono. E manatu foi i lenei taeao, o lea foi ua saunoa le afioga i le Minisita e ana le Tulafono. E momoli atu lau faafetai i le tulaga o le Tulafono ma nei suiga ua i ai.

Ona o au ou te i ai i totonu o le Komiti lea, sa ou manatu ou te le fia tulai e fai sau mau e uiga i le mataupu. Ae talu ai ona o lea ua faalogologo atu ma le totoa i le tulaga lea, e pei e i ai nai tulaga foi nei i le feteenaiga o le mafuaaga o suiga nei. Ae ou te talanoa ou te talanoa i le 2014, e lelei lava le manino o le Maota.

Ou te le i i ai i le Komiti i le taimi lea, ae fai lava i si ou malamalama laititi i le mafuaaga o le suiga. Ona e lelei lava le faafofoga foi o le Maota, o la foi e faafogafoga tapuai mai le atunuu, i le mafuaaga o suiga nei, na mafua ai ona toe faafoi. E faafetai i le Afioga i le Minisita aemaise foi Taitaifono o le Komiti, ia faapea foi le Pulega ua toe faafoi ai tulaga lava ia tau uafu i le Matagaluega o Uafu.

Ma ou te fia talanoa i le mafuaaga ina ia manino mea uma. Ona o le aso lea na mafua ai ona tulai mai le mea lea. O au sa ou sauni ou te alu i Savaii, peitai o le taimi ou te malaga ai i Savaii. O le vaa lea e taunuu mai le vaa muamua i le uafu lea e usu mai i le 6:00 i le taeao, ona toe foi lea i le 8:00. Ou te manatua le vaa ua sau, o i ina na taunuu mai ai le faalavelave, e le o se faalavelave tele, ae tele lava le afaina. Ona e mafua mai, ua i ai foi nai faatamala. Ua le tapena le aufaigaluega ina ia manino le vailiu lea, ae le o ni aitalafu na mafua ai.

Ma sa iu lava ina faaletonu uma malaga i le taeao lena, e pei e tasi lea vaega tele na mafua ai, tulai mai le faaletonu. Ou te iloa sa i ai se taimi na tulai mai ai ma le faaletonu i le tatou sa lea. E pei la o i lea na mafua ai ona ae se finagalo foi o le Minisita i lena taimi 2014, ma lenei foi Itu o le Faigamalo, na ala ai ona fai le suiga lea. Ae ou te faafetai i le Minisita o lea ua toe faafoi le... e pei o nai feteenaiga na, i le va lava lea, i le va o Mulifanua ma Salelologa.

Ona o lea ua matau atu, o lea ua sologa lelei ma matagofie le faagasologa foi o Matagaluega ia e 2 o le Shipping ma le Port Authority o mea tau uafu. Ae pei e tasi lena, le mafuaaga tonu lea ua ou tulai atu ai ma le faaaloalo, e le o se tulaga foi lea na mafua ona fai fesuiaiga a le Malo i le taimi lena, ae ona o le tulaga ua tulai mai i le aufaigaluega, lea na i ai nai faatamala laititi na lau afioga.

A o lea ua momoli foi lau faafetai i le afioga i le Taitai o Uafu, faapea le o lo o pulea le Matagaluega o le Shipping Corporation ma le Minisita. O lea ua matau atu, o lea ua toe faafoi lava le tulaga o Uafu i le Matagaluega. Ma lou faaaloalo lava lau Afioga i le Fofoga Fetalai.

FOFOGA FETALAI: Ia malo faafetai. Tulai mai lau Afioga Tapunuu, le sui usufono mo Vaimauga 3.

Afioga Hon TAPUNUU NIKO LEE HANG (Vaimauga 3): E faafetai atu i lau Afioga i le Fofoga Fetalai mo le avanoa. O le fesili lea na toe fesiligia e le Afioga ia Lauofo, o lau fesili lea na fai i le tatou debriefing, i le tulaga lea o le toe ave uma aseta a le Kamupani Vaa i le Pulega o Uafu, ae taatia ai aitalafu. O lea la ua faamanino mai e le Minisita, faafetai i lau Afioga Olo, o lea ua tau malamalama atu. Ae manatua foi tatou, o le matou Faigamalo na matou tulai mai loa, matou vaai i tulaga ia e faaletonu, o le ala fai lena o le mea lea na toe.... ona ua afaina tele le Pulega o Uafu i mea tau seleni. Ona i ai lea o le fuafuaga o le a tau ave loa mo se taimi, atonu e i ai se taimi e toe lelei ai, ona toe foi foi lea i le mea masani.

O lea la ua outou taunuu mai, le Faigamalo, o lea ua outou silasila, o la ua lelei. Ua faafetai o lena ua lelei, o lena ua fai le fuafuaga e toe ave mea a Kaisara ia Kaisara. A o le tulaga lea na fai ai le fesuaiga ona ua mafatia tele le Pulega o Uafu i le leai o ni tupe. O lea la na tau toe pick up ai loa le tupe lea, lea ua taunuu mai la outou Faigamalo, o lea ua toe sologa lelei.

Ae faafetai mo le toe faafoia o le mea lea sa i ai, o lea ua lelei uma Kamupani e 2, ua lelei tupe a le Kamupani Vaa lelei foi le Pulega o Uafu. E pei o le tulaga lena na ou fesiligia ai le mea lea. O lea la e manino mai foi i le saunoaga e leai ni aitalafu, na o se tulaga foi lele o faaupuga e ave, a faapea lava e i ai ni aitalafu. A o lau tatalo a o ni aitalafu lava a le Kamupani Vaa, ae aua le ave fua aitalafu foi nei, ne i mea ane ua tigaina ai se isi Faalapotopotoga ma le Malo ma o lea e pule ai lau Afioga. E leai se mea, e fai lava e oe le tulaga talafeagai, ina ia manuia uma Faalapotopotoga e lua, o le Pulega o Uafu ma le Kamupani Vaa. A o lea ua manino lau saunoaga, i lau fesili na ou fesili ai i le tatou debriefing, i le tulaga lava lea o le ave o aseta ae tuu ai pea aitalafu. O lea la ua manino, ia faafetai mo le saunoaga manino ua malamalama ai foi lou sui usufono. Ma lou faaaloalo lava.

FOFOGA FETALAI: Malo saunoa.

Tofa Hon Olo Fiti Afoa Vaai: Ia faafetai lava i sui usufono mamalu, faafetai i le Afioga ia Peseta mo le timaiga. E sao sa i ai le afioga i le sui usufono i le Komiti tonu lava lea sa matou i ai. O le tulaga lena, o lea foi ua toe faamanino mai e le Afioga ia Hon Papalii, e sili ai ou te manatua le tulaga lea.

O aitalafu ia lea tatou te talanoa ai ne i mea ane ua faapea o aitalafu uma a Pulega. E leai pau lava le tulaga lea e i ai, o le fesuaiga mai o uafu ia e i Salelologa ma Mulifanua lea sa i lalo o le Shipping, lea ua toe aumai i lalo o le tatou Pulega o Uafu. O aitalafu tonu lava lea e talanoa atua i, o aitalafu i le va o Salelologa ma Mulifanua. O lena e le o toe i ai ma se aitalafu o toe

i ai. Ou te alu atu o fofoka ai le aitalafu i i, i le 13 masina lea, ou alu atu loa tope, o la ua leai ma se aitalafu.

FOFOGA FETALAI: Ou te talitonu o lea ua manino nei mea o aitalafu. Tulai mai le sui usufono mamalu o Satupaitea.

Afioga Hon LAUTAFI FIO SELAFI PURCELL (Satupaitea): E faafetai i lau Afioga i le Fofoga Fetalai mo le avanoa. Ou te tulai atu ma le faaalalo tele i lenei Tulafono, ona e taua ia o le tulafono lenei i lou nei sui faapea lou itumalo. Ona o matou nei mai Savaii o lo o faia le faiva lea o le femalagaai. Atonu o lena e silafia e lau afioga i le Fofoga Fetalai.

O le popolega lava o se manatu, aua o mea nei o suiga e i ai lava tau e fai ai, there are hidden costs. O lou popolega la i uma ae nei mea, ae ua i ai ni tau e le o aliali mai i i, pe le o iloa foi i le taimi nei, e ono amo la e latou femalagaai. Aua po o a lava suiga, at the end of the day, the consumer pays the cost. O lau fesili la i le Afioga i le Minisita, aua o lena foi si ou uso i ina e vaaia le Shipping. O i ai se guarantee a le Malo o suiga nei o le a fai, e leai se afaina o pasese i le feoai i le va o Mulifanua ma Salelologa, aua ne i i ai se tau foi lea, i oo i se taimi faapea o lea ua le maua le tupe lea, lea la ua tatau ona sii i luga. O le faafesili lena, po o i ai ni tulaga faapena.

E faafetai i si ou uso ia Peseta, o lea ua faamalamalama atu le tulaga lea sa ou laga i le aso o le pre sitting. E leaga e faalua ona ou lavea ai i le mea lea. E leaga ou te fai atu i le aso lena, ae pei e faatalatalaula e le Minisita, e pei e leai se mea, ai lava o mea na ou te manatu au i ai. E le faia ni ou manatu na o au, e ala ona fai leaga o mea la sa tutupu ma ou tilotilo i ai, lea na aafia ai le vaa, e sao Peseta. Aisea? Na sau le vaa manao e pipii i le uafu, ae se i oso se tama o le Shipping i lalo e nonoa maea, ona ua leai nisi o le port, leaga e ese lava fuafuaga a le Port Authority, ese fuafuaga a le Shipping Corporation. Na tupu ai le mea lena, tupu foi i Savaii. E tasi lava lena mafuaaga na ou finau ai foi au, tuu uma i lalo o le Pulega e tasi, ona lea o se mea e tulai mai faapena, ae na tupu le mea lena.

O le tulaga foi lea faapea ona o le tele o le aitalafu a le Port na ala ai ona tuu i lalo o le Shipping, e i ai se tulaga faapena sa i ai. Sa le maua tupe e le Pulega o Uafu sa tatau ona maua, e maua ai ni latou dividend. O le faaiuga la o mea na, ua run down tatou uafu ia i Salelologa ma Mulifanua. E pei... ona laga foi lea o se leo, e pei e le amanaia tagata ia e feoai i le va o Upolu ma Savaii. A e susu i na aso i faleletaua se i tulou, ona e iloa lea o se tulaga na oo i ai. A o le Shipping, sa tele a latou tupe, sa i ai a latou tupe aua foi e monopolize lava e latou i le femalagaai a tagata. O lea la na fetuunai, e o ifo le Shipping e fai i lena taimi, o se tasi lena o mafuaaga, o mea lava e faapea ona fai, e fetuutuunai lava e le Malo, se i toe pick up le Pulega o Uafu i latou tupe maua, ona i ai lea o se tulaga. O lea la ua outou afifio mai, o lea ua toe faataunuu le tulaga lena, o le tulaga e fiafia ai, e pau lava ia o mea ou te

popole i ai. Na sui foi e le Faigamalo ia faiga ina ia...lea sa saunoa le Afioga i le Minisita i se gasegase sa i ai. Ioe na matou iloa foi le gasegase lena lea na fai ai suiga, i le Pulega faapea foi i latou e vaaia ia komiti faatonu. Ona fua mai lava lea ua toe lelei, lea la ua oo mai i le taimi lenei, e fetau lava le oo mai o le afioga i le Minisita, o la ua lelei. O lea la ua sau loa sui le tulafono, ia faafetai, o le mea sili ua aoga ia galuega sa matou taumafai e fai. Ae momoli atu lau faafetai, aua o lea ua silasila le Faigamalo o se faiga lea o le a faaleleia atili ai. E pau lava lena o lau tatalo, ne i te i ua i ai ni tau e amo e le au femalagaai mai Savaii ma Upolu.

O le tulaga foi lea e saunoa i ai Olo e faapea o i latou e o atu i le pre-sitting ae omai fesili soo i i, o ia lava lea sa faia lena amio i la aso. E tusa lava pe i ai i le pre-sitting, ae sau lava ia fai mai leaga o le pre-sitting e le o se mea aloaia lena, o i e aloaia ai. A o lea e pei e faitio mai pe a tu atu, ae o lea e i ai lava fesili e tupu mai aso uma.

Ma lou faaaloalo

FOFOGA FETALAI: Ia malo faafetai.

Tofa Hon Olo Fiti Afoa Vaai: Lau Afioga i le Fofoga Fetalai.

FOFOGA FETALAI: Mo le faasaoina o lou taimi lau Afioga i le Minisita, se i tulai mai lau Afioga i le Minisita mo Pisinisi ma Alamanuia.

Tofa Hon Leatinuu Wayne Sooiolo (Minisita mo Pisinisi Alamanuia ma Leipa): E faafetai lava mo le avanoa, ae fesoasoani atu foi i le mataupu ua talanoaina, masalo sa ou i ai foi i le taimi sa taumafai ai e fesui ia tulaga. O le mea lava e ao ona silafia foi, ona ua le lelei foi le taitaiga o lena vaitaimi. Aua a na faapea le taitaiga i lena vaitaimi, e leai se mea e faia. A o le mea ua tupu, ua tele poloketi a le SPA ua avatu e faatinoina i lena taimi, lea ou te iloa lea e i ai le slipway lea e i tua i le uafu i tua i Satitua, lea foi sa ou vaai o i ai le mea lea pei se restaurant lea pei e i ai se vaa lea e tafeafea i luga o le sami ae fai ai le faleaiga lena e \$1, aemaise foi o le faatinoina o le marina ua tele ona tulaga ua tataua ona faatino i ai. Ou te iloa foi o le fautuaga a le Afioga ia Peseta. Aua o ia sa fautuaina le Palemia i lena vaitaimi, lea na ala ai ona mafai ona fai nei mau poloketi, ae silafia lelei i lena vaitaimi, e le tataua ona faia, ona e le lava le tupe a le SPA na i ai i lena vaitaimi. Ae ua faatino faatino, e le faapea la ua toe aumai ona ua lelei, e leai o lea ua toe aumai ona ua uma ona fai ua gau. O lea la ua toe... e i ai foi ma isi poloketi o la foi e gau, o lea e taumafai atu foi, o lea e tau faasaosao i lenei vaitaimi. Ae pei na ona fesoasoani atu ai faapena, ne i te i ua faapea, e leai o la sa lelei ia matou, a o lea ua outou o atu outou lelei ai. E leai, sa leaga ia outou a o lea ua lelei ia matou. Ma le faaaloalo lava lau Afioga.

Afioga Peseta Vaifou Tevagaena (Faasaleleaga 5): Lau Afioga i le Fofoga Fetalai.

FOFOGA FETALAI: E te faauilavea i le faauilavea, e te silafia foi e le mafai ona faatino lea vaega.

Afioga Peseta Vaifou Tevagaena: E faafetai atu lava i lou uso Minisita. Ae silasila foi, o le talanoa lea e talanoa ai le Minisita, o lea e talanoa mai i le Paeaiiga muamua. Ae faatoa afio mai le Minisita nei i le 2016, ae o le 2014 lea ou te talanoa atu ai, na tulai mai ai faafitauli ia ma fai ai i ina suiga ia lau Afioga i le Fofoga Fetalai. O le mea e fia faasao.

FOFOGA FETALAI: O lea ua maua lua felafolafoaiga, atonu o le tatou Tulafono lea e talanoa o Mulifanua ma Salelologa. Ia tulai mai lau Afioga i le Minisita e faauma mai lea mataupu.

Mo le faasaoina o lou taimi lau afioga i le Minisita, se i tulai mai Loau.

Afioga Hon Loau Solamalemalo Keneti Sio (Sagaga 1): Ia faafetai tele ua maua le avanoa. E leai ou te le faalavelave foi i le faafefinauaiga, i le la Itu ma le taumafai atu foi o lenei Itu toagaogao. Ae na o se faamanatu i Afioga i le Alii Minisita o lo o sausaunoa nei.

O la e afio mai le Afioga i le Sao Faapito lea sa faapena ona lipoi e tusa ai foi ma fuafuaga a le Malo sa i ai i lenei vaitaimi. E lelei le fesili sao i ai, o lea ou te vaai atu, o la e faagaugau le ao o le Sao Faapito, ona o la sa sao lava mea sa fai i le la vaitaimi aua sa i ai.

FOFOGA FETALAI: Ua ou manatu o lea ua tatou see ese ma le tulaga...

Afioga Hon Fiamē Naomi Mataafa: Lau Afioga, ai lava o le mea lea ua te i ua lavea fua o la e fai a latou tala. Lau Afioga i le Fofoga Fetalai, faafetai o lau tala lea e fia fai atu, o lea foi na ou faauilavea i fetaliaiga a le Minisita ma le Taitai o le Itu Agai. O lea tatou te i luga o le faitauga lona lua, o tulaga o faiga faavae ma tulaga aoao. A o lea lava e vaai atu lava, fai mai o aitalafu, o vaa ua le mafai ona nonoa. O mea foi ia e details, a o le faiga faavae, o lea e saunoa mai ai, o lea foi e talanoa atu, po o fea e nofo ai le Pulega o Uafu. O fea e nofo ai? O fea le mea e aupito sili ona lelei ai? O lea foi na saunoa mai le la itu, na sui ona e i ai mafuaaga, e leai se isi o fai atu a mea la e...ua fai le mea e fai i le taimi. Ae a tatou talanoa i le Tulafono o le Pulega o Uafu, o lenei sa nofo i le Faigamalo. Ona tatou fesili lea, o le a le mea e fai ai a tatou Pulega, Authorities? Ae le mafai ona aoao i ai ia mataupu uma ia?

E mafua ona e le o mafai ona faatino e tagata po o le Faigamalo le faamoemoe o le Tulafono ma le Faiga Faavae na faatu ai le Pulega o Uafu. We lack the capacity to do it. Pe o le lava o tagata faigaluega pe o le

lava o faiga faavae a le Malo, o le a le mea lea e tupu? Ona tatou oo lea i le mea foi lea, sue po o le a le mea e togafiti ai le mai. Ae galo le faiga faavae ma le Tulafono lea e fau ai. E talanoa atu lava i lau Afioga. O le a alu ai foi a tatou faiga i lenei Nofoaiga, ini mai sia mea, ini mai sia mea, ae tatou te le talanoa, i faiga faavae lea e fau ai lo tatou Faigamalo. A tatou manao i Pulega, uafu, vaalele, tagata tafafao, o a uma isi ituaiga Pulega ia e i ai, ia tatou faamautinoa e mafai ona faatino galuega ma matafaioi a Pulega na.

A faapea e le lelei, ona toe fesiligia lea o le faiga faavae, aua o le mea lea e tau mai i le suiga o le 2014, lea ua toe sui atu nei, sa i ai lava le vaaiga faapitoa mo tatou uafu ia i Mulifanua ma Salelologa. O lau tatalo lau Afioga i le Fofoga Fetalai, se i tau siisii i luga le tatou mafauaiga i tulafono e oo mai i totonu o le Maota, faafetai.

FOFOGA FETALAI: Atonu o lea ua outou faafofoga mai foi i le faalaeiau ma le faalototele a le Tamaitai Palemia. O le manatu lava, o le tatou faitauga faalua, lea tatou te talanoa i faiga faavae, ae le o ni nai mea tosogamaea ma ni mea faapena. O lea tatou te talanoa i faiga faavae ina ia mautu lelei le tatou Tulafono lea tatou te talanoa ai. O le mea lea e taua le fesoasoani a le Palemia mo tatou uma o lo o fuafua mai foi. Ia tatou saunoa lava faalauaitale i faiga faavae, ae aua le auiliilia maia mea ninii.

Lau afioga i le Minisita se i tulai mai.

Tofa Hon OLO FITI AFOA VAAI: Ia faafetai atu i afioga i sui usufono mamalu sa sausaunoa i nisi foi o vaega o le tatou Tulafono e faaleleia ai tatou Tulafono, aua o le aoga lenei o le tatou felafolafoaiga. E i ai foi le tulaga e pei sa ou talanoa atu, e i ai le feau taua o lea e momoli atu e le fesuiaiga lenei. E le gata la i i, i le Pulega o Uafu ma Pulega o tatou Vaa, ae faapena foi i si itutino o le tatou Faigamalo. I le mea lava lea o le faaletonu loa, ua fai loa fetuunaiga ia. A o le feau lea e molimoli atu i le mataupu lenei, o le le faia o fetuunaiga ia, ae saili tonu po o fea le mafuaaga o faaletonu ai. A o le faaletonu o lea e matauina e le tatou Faigamalo, o le faatinoga o tiute ma galuega. E le gata foi la i Matagaluega i tagata faigaluega, ae faapena foi le Minisita e vaaia ma le tulaga o le komiti faafae. E lavevea uma ai lava ona o decisions e fai, e mafua ai ona faaletonu se mea. E pei la o le feau taua lenei o lea sa momoli atu e le fesuiaiga lea. O lona lua, o le faiga o fesuiaiga e tatau ona mulimulitaia ia Tulafono. O lea e manino lava le tulafono a Matagaluega Tumaoti a le Malo, o la e manino le tulafono lenei. Ae sa fai foi i luga o le faaiuga a le Kapeneta i lenei taimi, pe sa faia pe le i faia, a o lea e taatia le Tulafono ua uma ona taoto e mulimulitaia e Pulega a lo tatou Malo.

O le tulaga lea lau Afioga i le Fofoga Fetalai, e leai se aafia, lau Afioga Hon Lautafi, i le tulaga e siitai ai ia ni pasese ma aafia le mamalu o le atunuu, e leai se fuafuaga faapena. O le cost foi latou lea e saunoa i ai lau Afioga, e leai foi se tulaga faapena. Ua malilie uma itu e lua i le fesuiaiga lenei, e pei

ona fai, ona e le gata ua malolosi faatasi, a o le mulimulitaia foi o le Tulafono.

I le tulaga lea na e saunoa i ai, e sao. O lou faitio ia i lena taimi a o ou nofo mai i ina i le mea lea o le uma o le pre-sitting ae taofiofi ai au i i. O le taimi lena lau Afioga Lautafi, e le i tuua le vaega lea i totonu o le tatou Tulafono Tumau 185. O la la ua i totonu o le tatou Tulafono Tumau, e aloaia ia felafolafoaiga i totonu o pre-sitting a le tatou Palemene. O le taimi lena e le i faia se mea, sa sao lava lau tala na fai atu.

Ae i le tulaga e pei ona saunoa ai lau afioga o lea sa lelei, toetiiti lava 10 tausaga o outou mafaufau pea po o le a le mea o e a fai i le SPA ma le Shipping Corporatopm, 10 tausaga, a o au, 10 masina, lea na ou sau loa sui loa. Ma le faaaloalo.

Afioga Aliimalemanu Moti Momoemausu Alofa Tuuau (Sui Tamaitai - Alataua Sisifo): Lau Afioga i le Fofoga Fetalai...

Tofa Hon Lauofo Fonotoe Nuafesili Pierre Lauofo: O le fesili faamolemole ona o au lea sa lauga, lea ua tali le Minisita

FOFOGA FETALAI: Ou te iloa ua atulasi avanoa ua tuu atu i lau Afioga, ma o le faaumiumi foi lena, a o lea e talanoa lava i le mea e tasi lau Afioga i le Sui Taitai.

Tofa Hon OLO FITI AFOA VAAI: Lau Afioga, o le tatou Tulafono Tumau, o lea o le a alu le faa-fa ona tulai le Sui Taitai.

Tofa Hon Lauofo Fonotoe Nuafesili Pierre Lauofo: E i ai le mea lea ou te fia fesili atu i le Tulafono Tumau 185, le teuteuga a o lea ou te vaai atu i le 185 o le contempt of parliament, e mamao lava le mea lea e te fai mai ai. Soia ia e te aumaia mea tau faasese i totonu o le Maota.

FOFOGA FETALAI: O lea la ua oulua see ese ma le Tulafono lea e talanoaina. Ia tatou agaitonu i le tatou Tulafono lea e talanoaina, ona faigofie lea o le tatou galuega. Se i tulai mai le sui tamaitai o Alataua Sisifo.

Afioga ALIIMALEMANU MOTI MOMOEMAUSU ALOFA TUUAU: Ia, faafetai mo le avanoa. E faatalofa atu i lau Afioga i le Fofoga Fetalai, faapea foi i le la Itu o le Maota, o Samoa ua potopoto i lenei taeao fou ma le matagofie. E faafetai i lau Afioga i le Minisita mo le Tulafono ma e lagolagoina i le tulaga aotetele ona o le tulaga e tataua ona i lalo o se Pulega e tasi ia le vaiga o le uafu. O le tulaga lena o lea e ala ai ona tulai atu e fai sina manatu. Ua lagalaga foi finagalo o outou tama o le Maota nei, se po o ai lava sa faia mea lelei, a o ai foi sa faia ni mea le lelei, lei o tatou tatou te

galulue faatasi, ina ia fai se tatou auaunaga mo le atunuu. Soia ia le vaavaai po o ai na fai lea mea ma lea mea. Fai mai le tusi faitau aso a le EFKS i le taeao lenei, le manatu autu, “Taofi taua.” A o le manatu autu o le vaiaso atoa lenei, “E fesootai i Malo, ina ia fifilemu.” Ia na ona tomua atu faapena o se tala lau Afioga i le Fofoga Fetalai.

Ae o le Tulafono e lagolagoina, ae ona i ai lea o se tuualalo lau afioga i le Fofoga Fetalai. Ona e matau i tulaga faapea, o lea e i ai le interest o le vaega lea o le Faalapotopotoga e ona vaa. E i ai foi la lo latou manatu ina ia faaleleia ia uafu, aua foi o i latou e ona mea totino nei, lea e faaaogaina uafu ia e i Salelologa ma Mulifanua. Ona i ai lea o se manatu aua a faapea o lea o le a toe tuufaatasi, lea e ala ai ona i ai le Tulafono lenei, tuufaatasi le Pulega o Uafu. E i ai foi lava le naunautai o e ona vaa, ina ia lelei le vaaiga o uafu ia aua e manumanu foi i latou ia latou meatotino, e ui o meatotino uma a le Malo. A ua maioio ia a latou matafaioi e faatino ai le latou auaunaga i lo tatou atunuu. Ona i ai lea o se tuualalo, pe a pe a i ai se vaega o le Tulafono Faatonutonu, ia i ai se sao pea o le Faalapotopotoga o Vaa. E le faapea ina ia feteenai ai, ae ia i ai lava so latou sao, pe o se say i totonu o le vaaiga o uafu. E pei ona ou taua, ona o lea e i ai le latou interest, o latou meatotino ia o vaa ina ia lelei ona vaaia.

E pau na o se sao o lenei usugafono e faaopoopo ai i le tatou Tulafono ua opea i Maota. Faafetai lau Afioga i le Fofoga Fetalai mo le avanoa.

FOFOGA FETALAI: Mo le faasaoina o lou taimi le Afioga i le Minisita.

Ia malie Aiga i le Tai o lea ua muamua mai Salega 1. Tulai mai lau Afioga i le sui usufono mamalu.

Afioga FEPULEAI FAASAVALU FAIMATA SUA (Salega 1): E faafetai i lau Afioga i le Fofoga Fetalai mo le avanoa. E leai sau fesili, ae talu ai ou te le i auai i le Pre-Sitting lea ona e taunuu mai le matou malaga ua pogia Samoa. Ae momoli lau faafetai i lau Afioga i le Minisita i le 10 masina sa e silasila totoa ai o lea ua fai le suiga. O au o le Taitai Komiti o Galuega Tetele a lo tatou Malo. E tasi lea vaega ua leva ona ou tuualalo i ai, ona e tele se aafiaga o le Matagaluega po o le Pulega o Vaa i ana tupe maua i le faaleleia o le uafu, ae ou te vaai mamao i tatou vaa ia e feoi i le va o Mulifanua ma Salelologa.

Ua momoli foi le faafetai i le Pulega o Uafu i le matauina i le vaai i le lelei atoatoa o le vaaiga o uafu i lena taimi. Ae ua sili ona siitia le maualuga ma le matagofie ina ua tuu i lalo i le Pulega o Vaa. A o tua atu, ua tele le aafiaga o ona tulaga tau tupe.

Faafetai i lau Afioga i le Minisita i le vave ona fofo o le faafitauli, aua a le fofoa, ia ona sao ai lea o le upu, e ui lava le mai. O lea ua sefe mai la tupe a le Matagaluega po o le Pulega o Vaa, e i ai vaa la e faalalava i Salelologa ma Mulifanua ua faaetonu, ae ua ou fiafia ina ua fai le suiga lea, o le a agai

lava seleni ma tupe maua a le Matagaluega po o le Pulega o Vaa e faaleleia vaa ia. Faafetai ai i lau Afioga.

O le isi tulaga e fesoasoani atu i lau Afioga i le Minisita, leaga o lea na ou maua nei atu lava o e saunoa e tausaili se isi uafu e faa-2 ai uafu faava o Malo. Ona toe foi lea i tua o lou manatu i le taimi o le Faigamalo ua mavae atu, faafetai lava i lo outou faaeaea i Salafai. E tasi lava le aso na tau ai Salelologa o le uafu faava o Malo. E oo mai le taimi lenei, e le i pipii lava se vaa container i Salelologa. Na alu atu mau e le i pipii. O lona uiga, e tasi lava le aso na tau ai Salelologa o le uafu faava o Malo. A o le taimi lenei, ou te le o toe faalogo ai. A o lea ua saunoa le Afioga i le Minisita, faafetai o lea o le a toe fai le uafu faava o Malo i Salelologa, e faa-2 ai uafu faava o Malo i Samoa. O le fesoasoani atu lea. Faafetai. Viia le Alii i lou tulai mai i le tulaga o le tofi o le itumalo, aemaise o le filifiliga o le Minisita. Ia manuia le Fono.

FOFOGA FETALAI: Tulai mai Aiga i le Tai.

Afioga AUUAPAAU MULIPOLA ALOITAFUA MULIPOLA (Aiga i le Tai): Faafetai i lau Afioga i le Fofoga Fetalai mo le avanoa. Ia, e fia faaluaina se agaga faafetai i le taulaga ua e siitia i le taeao, ua tatou momoli mea i faletui ma ua tatala faletalatala i Fogaa. Viia le alofa ma le agalelei o le Atua i lenei taeao fou i le soifua o le Taitai o le Malo, le Afioga i le Tamaitai Palemia ma le Sui Palemia ma le mamalu o le Kapeneta Filifilia, e faapea foi le Afioga i le Sui Taitai o le Itu Agai ma le mamalu o le la Itu o le Maota.

Ou te fia pai muamua e fia fai sau faafetai i lenei taeao. Ou te fia faafetai i le paia o lou itumalo ona e le o se tala e avane ai ona ua tele nai aso o outou silasila mai e le o nofoia le Nofoa o le tatou itumalo. Ae viia le Atua i Lona alofa ma Lona agalelei sa ou toesea lo outou sui usufono se i tau saili se malosi o le tino, lea ua outou foi mai le Maota se i fai le galuega ma lou valaauina na outou filifilia ai au. Viia le Atua.

E momoli foi le faafetai ia i latou sa o latou faia ni tusitusiga le totogia o au e faale-atoa le malosi ia ma se vaega o le tino. Ia saga faamanuia le Atua ia te outou.

Ia, o paia o le tatou itumalo o le a taalolo, paia aua oe le Susuga Tutasi ia Samoa, ae se i tapuai maia se i fai se sao ia manuvao e tusa ai o lenei Tulafono puupuu ae sili lona taua.

Lau Afioga i le Fofoga Fetalai, o le Tulafono atoa pei ona i lumamea nei ma le Laulau a Fono a le Palemene, e momoli lau faafetai i lau Afioga i le Minisita e ou le Tulafono. O le Tulafono atoa lava ua ou faafetai i lau tilotilo i ai, e ui lava sa i ai se taimi sa tuueseeseina ai, ia lea foi ua toe aumai i le ato lava e tasi, tulou le gagana. Ia o lea lava e i lalo o le Pulega a lau Afioga i le Minisita. Na pau lava lea o le ala o lou tulai, na ona ou faaoololomaau

ma ou piiama atu, ona o le tau fagufagu lava ia a Aiga i le Tai, pei lava ona ou fai atu, o lau lauga muamua lava i le Palemene lenei, o le mataupu lava lenei tau uafu, e le natia, ona o le Tulafono ma le upu lea uafu ua ala ai ona ou tulai. Ae manino i totonu o le Tulafono lenei, e le o taua ai le vaega lea, ae pei ona ou fai atu, na o sau tuualalo ma lau tau fagufagu, a o le faamamafa lava ia o le Tulafono, Pulega o Uafu. Lea ua toe aumai le vaega lea sa i lalo o le Faalapotopotoga o Vaa i lalo o Pulega o Uafu. A ou talanoa loa i le upu lea uafu, e faasino i tagata soifua ma meatotino felauai. O lona uiga, e ese le taua. Malaga mai le isi motu i le isi motu. O lea foi ua ou maua, e i ai uafu lea e faava o Malo e i ai foi uafu o lea e taua o domestic ports. Ia po o le a lava, ia o ports of entry lava.

Ae na o sau tuualalo i lau Afioga i le Minisita, e le natia sa tatou ave le savali o le filemu ma laasia lou motu lea i le soua o le gataifale. Masalo ua lava la le tau fagufagu lea, lea foi e nonoi atu ai lou sui usufono, se i e alofagia lou uafu lea i Manono-uta. A tatou talanoa foi i le uafu ma tagata, tasi lenei motu e ese le togi lafoga o tagata ma lenei itumalo o Aiga i le Tai, ona e maua i le felauai o tagata i le motu i tai ma uta, tele o tagata togi lafoga. E i ai leoleo, e le natia. E i ai loia, fomai, faiaoga. Ae o le tatalo a le itumalo lau Afioga i le Minisita, avatu ia ma au i lalo o le faamalu lena, faa-domestic port le uafu lea, tele tupe la e i ai. O le matua tele lava o le turisi lea e agai i le motu lenei o Manono. Tasi lea vaega ua ou mafaufau i ai i le poloketi lea ua tuuina mai ai le miliona ina ia atinae le vaega tau turisi i le motu lea o Manono. O le mea e lelei i Upolu, lelei i Savaii, ae atoa Samoa pe a lelei ia Manono ma Apolima, o le feagaiga.

Ia o le mea lea, o lau tatalo lea i lenei vaega o le aso. Manuia lau Afioga i le Minisita. O le Tulafono atoa ua talia e Aiga i le Tai ma le agaga mauualalo. Manuia lau Afioga i le Fofoga Fetalai. Faafetai.

FOFOGA FETALAI: Malo saunoa. Faafetai mo le fesoasoani foi i le Minisita aemaise foi o le taumafaiga o le uafu o Aiga i le Tai.

Ia o lea ua matau atu Tapunuu, e i ai se mea e te fia saunoa ai?

Afioga Hon Tapunuu Niko Lee Hang: O nai fesili lava ia faamolemole i lau Afioga e fia malamalama atili ai pe maua se avanoa?

FOFOGA FETALAI: O fesili ia ai?

Afioga Hon Tapunuu Niko Lee Hang: I le saunoaga a le Minisita lea o Kamupani aemaise foi le Afioga ia Olo. E puupuu lava.

Tofa Hon Olo Fiti Afoa Vaai: Lau Afioga i le Fofoga Fetalai, o au e ona le Tulafono. A fia fesili mai, fesili mai la ia te au. A o lea ua uma avanoa e

2 a le Afioga ia Tapunuu, ou te le iloa la po o fea o taoto ai le tatou Tulafono Tumau.

FOFOGA FETALAI: Ia, pei o le mea foi lena e tau fesoasoani atu ai, o oe foi o se tasi o tama matua o le Maota. Tapunuu, e talitonu lava ua malamalamagia mea uma. Ua maea le taimi sa tuuina atu i lau Afioga.

Afioga Hon Tapunuu Niko Lee Hang: A le talia lava lau Afioga e le afaina, a o se mea e fia manino ma fia faamalamalama ia manino le Palemene.

FOFOGA FETALAI: Atonu i le taimi e toe auiliili ai le tatou Tulafono, ia maua lou avanoa faa-3. Ma le agaga faaaloalo.

Afioga Hon Tapunuu Niko Lee Hang: Ia faafetai pe a toe maua se isi avanoa. Lau Afioga i le Minisita na ona ou fia...

Afioga Sulamanaia Fetaiai Tauiiili Tuivasa (Vaimauga 1): Lau Afioga i le Fofoga Fetalai pe maua se avanoa o lenei itumalo...

FOFOGA FETALAI: Ia leaga o lea sa muamua mai le sui usufono mai i o, ae ui i lea, o le a felafuai foi le tatou itu i lea itu. Ia se i tulai mai lau Afioga i le sui usufono mamalu mo Vaimauga 1.

Afioga SULAMANAIA FETAIAI TAUIIILI TUIVASA: Ou te masalo ae le i faia se sao o lenei itumalo i le Tulafono ua opea nei i le Maota, e muamua ona faatalofa ma ofo alofa atu lenei itumalo i le afio o lau Afioga i le Fofoga Fetalai. E faatalofa foi ma ofo alofa atu lenei itumalo i lena tala na atoa, i le afio o lau Afioga i le Tamaitai Palemia, le Sui Palemia ae a le afifio o Afioga i alii ma tamaitai Minisita o le Kapeneta, faapea foi Minisita Lagolago.

Liliu mai lenei itu, e faatalofa foi ma ofo alofa atu i lau Susuga i le Sui Taitai aemaise foi le afifio o Afioga i alii ma tamaitai sui usufono o le Palemene o Samoa.

Faamalo le galulue, faamalo le manatu i si o tatou atunuu. O lea ua tatou i ai i lenei masina lona 10 o lenei tausaga, ia o lo o see lava le sa o Samoa e ala i le taitaiga a lena Itu i lau Afioga i le Tamaitai Palemia, a o le taitaiga foi o le Maota e lau Afioga i le Fofoga Fetalai. E momoli ai le agaga faafetai o lenei itumalo.

O le Tulafono lenei, e lagolagoina e lenei itumalo. E momoli ai le agaga faafetai i le Afioga i le Minisita ona o tulaga ma suiga ua tuuina mai i totonu o le Maota lenei. Na pau lava le tuualalo a lenei itumalo, o tagata faigaluega. O lea ua maua o le a toe faafoi uma lava i latou sa i lalo i o i le SPA. Ae o le

tatalo a lenei itumalo i lau Afioga i le Minisita, ina ia mafai pea ona tuu avanoa i nisi foi nei e le o fia o, e le fia o i le SPA ae naunau ia faamalolo loa ina ia maua ni latou tau. E pei o le tulaga lea na fai i o i le suiga i le le fia omai o le traffic mai leoleo agai i le Matagaluega a Leoleo lea na maua ai nai tau faapena. E pei o le tatalo foi lena. Aua e i ai lava isi e naunau faapena e le fia o i o i le SPA po o le mea lea o le o agai i ai, ae fia manao lava ia malolo loa, ina ia mafai ona maua pea avanoa o i latou nei le aufaigaluega, ina ia mafai ona entitle, faamalolo loa ma ave i ai ni faamanuiaga e tusa ai ma le auaunaga i tausaga ua tuanai po o tausaga e tele.

O le agaga lava o lenei itumalo, afai o ni suiga ina ia mafai ona manuia le lautele o le atunuu, ia viia le Atua. Ae afai o ni suiga e mafai ai ona maua foi le aua ne i fai e le isi Matagaluega ni mea, fai faalua, ae ia tasi lava le Matagaluega e tuu uma i ai le auaunaga lea e tasi.

O le isi o popolega o lenei itumalo o le tulaga tau lafoga, aua o lea la o le a faasee le tulaga i o i le SPA, ia ona tulituli lea e le Matagaluega o Lafoga ni aitalafu sa i ai i lalo, ae faapea atu i i le Shipping, ia o la e ua ave i o, ina ia mafai ona silasila totoa i ai lau Afioga ma le Pulega i tulaga ia e le i mafai ona tuuina atu i o. Ou te i ai i le Komiti o Galuega Tetele....

FOFOGA FETALAI: E vaelupeina le saunoaga a le sui usufono mamalu, talu ai ua tatou taunuu mai i le tatou taimi malolo o le taeao, o lea e faamalie atu ai i le saunoaga, e faaauau le saunoaga pe a tatou toe taliu mai i le tatou malologa.

E faasilasila atu ua faataatiaese Galuega a le Fono Aoa mo lana malologa masani o le taeao.

Na faataatiaese Taulumaga a le Fono Aoa i le itula e 10:45 i le taeao mo lana malologa masani ma toe faaauau i le itula e 11:15 i le taeao.

FOFOGA FETALAI: Ou te faasilasila atu ua toe amatalia nei Taulumaga o le Fono Aoa Faitulafono. Faamalo faafetai le onosai i le tatou Maota. E i ai le manatu ua maua se faasiliga malosai e ala i le tautega o le taeao sa alofaiva i ai le mamalu o le Palemene.

E faataatiaese a tatou taulumaga i le malologa o le taeao o lo o saunoa le sui usufono mo Vaimauga 1. A o le i tuuina atu le avanoa i le sui usufono mamalu, o si faasilasilaga lea ina ia faamanino foi se mea sa laga e nisi o sui usufono. O le toe teuteuina o le Tulafono Tumau 2021, ua aloaia ai loa le faatautaia o Pre-Sittings, o Tulafono Tumau 32(6) ua aloaia ai nei. Ia mo le silafia, leaga o lea sa talanoaina. O lona uiga ua aloaia foi tatou Pre-Sittings.

Ia, tulai mai lau Afioga i le sui usufono mamalu mo Vaimauga 1.

Afioga SULAMANAIA FETAIAI TAUILILI TUIVASA: Lau Afioga i le Fofoga Fetalai e momoli le agaga faafetai i lenei taeao i lau Afioga aemaise foi o le Failautusi ma le Ofisa o le Fono i le malutaeao o lea ua maea foi ona palegaauau le taliga o le sua i lena tala na atoa i le Afioga i le Tamaitai Palemia ma le Kapeneta faapena foi le paia o lenei Maota.

Ae ou te tulai i lenei taeao e faaauau foi se sao o lenei itumalo. E momoli ai foi le faamanuiaga a lenei itumalo i le toe tulai mai o le Afioga i Le Ao Mamalu o le Malo ma le Masiofo i le tulaga o le Ao Mamalu o si o tatou Malo o si o tatou atunuu. E momoli atu ai le faamanuiaga foi a lenei itumalo i lau Afioga i Le Ao Mamalu o le Malo, Tuimalealiifano aemaise foi o le Masiofo i le Afioga i le Maposua. Faamalo foi i lena Itu i le toe faaauauina o le avea o le faatuatuaga i le Afioga i le Tuiaana e avea ma Ao o Le Malo.

Ae le i faamaeaina lenei itumalo, e avea foi lenei itula lau Afioga i le Fofoga Fetalai e avatu ai foi le faamaisega i si o matou itumalo e tusa ai ma si ou aunty ia Kilisitina Taugalevaatele Tagiloa Tovia Tuivasa Luuga e tusa ai ma le valaau paia a le Atua, aemaise foi le tina ia Onopene Vui Tauai aemaise foi le tuafafine ia Tuvao, aemaise le uso ia Pili Eteuati, o lenei taeao na lagomau ai. Aemaise foi le Afioga ia Penina Tautele Sopi Leatitagaloa ma Papa Sopi Leatitagaloa. Ia, faamaise le agaga o le Atua ia te outou o tina aemaise foi le uso e tusa ai ma le valaau paia a le Atua i lenei taeao aemaise foi o taeao e faamaea ai foi toe sauniga o le tatou tina ia Tina. Ia agalelei pea le Atua ma ia i ai le mafanafana i lau Afioga Tuivasa po o Tauiiili e tusa ai ma le valaau paia a le Atua i si ou tuafafine, aemaise le paia o si o tatou nuu, aua Fusi ma Fanuatanu, aemaise foi le tina ia Onopene, ia faamaise le agaga o le Atua ia outou le fanau faanoanoa.

A o le Tulafono lau Afioga, ia e momoli lava le agaga faafetai o lenei itumalo. Mai foi le Paeaiga ua tuanai, e iloa gofie lava Minisita mataala e aumai ni Tulafono i totonu e toe teuteu ai ma faafaigofie ai le faagaluaeina o ni a tatou mataupu i totonu o si o tatou atunuu. E pei foi e i ai le mataupu lea ua toe tuuina atu ai foi le Matagaluega o le LTA i o ia latou, ia e momoli lava le agaga faafetai i lau Afioga i le Minisita ma le mataala foi.

O lea foi la ua toe tuuina mai lenei avanoa e toe avatu ai foi i lalo o le Matagaluega o le SPA le mea sa i lalo o le Kamupani Vaa, ia, e momoli le agaga faafetai i lau Afioga i le Minisita.

A o nai tuualalo na lea na tuuina atu e lenei itumalo, o le aufaigaluega le mea e sili ona popo'e i ai lenei itumalo, aua e leai lava se aoga o nei fesuaiga, ae maua ai ua faamavae pe vaea foi nisi o aufaigaluega a le Malo aemaise foi nei Kamupani o lo o galulue ai. A silasila foi i le lelei o lenei Tulafono ananafi na molimauina ai e lenei foi itumalo meli tetele ia ua agai mai totonu o si o tatou atunuu.

Ia, e momoli le agaga faafetai, o i lea e vaai ai le omai o Malo ma atunuu i fafo, aemaise la o le uafu e tatau ona lelei ma malupuipua le vaai. O le tulaga lena o le faafetai a lenei itumalo.

A o le Tulafono lau Afioga i le Fofoga Fetalai, e lagolagoina e lenei itumalo le Tulafono ua opea nei i le Maota. Ma lou agaga faaaloalo, ia manuia le Fonousu a le atunuu.

FOFOGA FETALAI: Malo faafetai saunoa. Ia, toe 2 a tatou sui usufono lea e totoe ona maea lea ona tatou talanoa aua o lea ua malamalama lelei lava i le tatou Pre-Sitting lea ua aloaia i le tatou Tulafono Tumau.

Se i tulai mai lau Afioga i le sui usufono mamalu mai Gagaemauga 2 lau Tofa Seuamuli.

Tofa SEUAMULI FASI TOMA (Gagaemauga 2): Faafetai i lau Afioga i le Fofoga Fetalai mo le avanoa. E faatalofa atu i lau Afioga i le Fofoga Fetalai aemaise le paia o lenei Palemene, tainane foi le faafogafoga tapuai a Samoa aoao, e le gata i Samoa nei ae faapea foi atunuu e mamao. E faatalofa atu foi i Ofisa Sili o Pulega o Matagaluega, aemaise foi o le Pulega a si au Matagaluega o Tina ma Tamaitai, Atinae o Nuu ma Agafesootai, aemaise foi le Matagaluega o Fuainumera Faamauina, o lo o faapea ona pale feagai ma o matou tagata. E faatalofa atu i le tapuaiga a lou itumalo, malo le soifua.

Ou te tulai atu ma le agaga faaaloalo aua foi sina motugaafa a lenei itumalo e tusa ai ma le Tulafono Tau Faaofi. Faafetai i lau Afioga i le Minisita. Ua ou fiafia lava ina ua i ai le Tulafono lenei. Sa ou lauga i le Tala o le Tupe ia Iuni, ona o tulaga faaletonu o luga o le uafu i le ulufale ma le ulufafo, e le gata i le uafu i Salelologa, aemaise foi o le uafu i Mulifanua i le faaletonu o omoomo o lo o i ai, e tele le aafiaga o taavale, o le mamalu o le atunuu e tuu nai o latou tagata ma pasese, a o lo o faaletonu le vaega lea. Faafetai i lau Afioga.

O le tulaga i pakaga taavale, faamalo faafetai. O le silasila foi a le Pulega fou o le a i ai i tulaga i uafu, pe le alagatatau ona fai lelei pakaga taavale i Salelologa ma Mulifanua, ia i ai foi se sikulati e galue faapitoa, ae tatau ona totogi, e tatau ona totogi taavale, a ta fia sau i inei, pe \$5 lava, ae o la e ta te sau ma lota fiafia o la e saogalemu si ata meatotino i le vaaiga a le paia o le aufaigaluega.

Ona e i ai le isi mataupu lau Afioga i le Fofoga Fetalai, lau Afioga i le Minisita, atonu pe fesootai pe le fesootai, ia, atonu e alu alu lava fesootai. O le matou itumalo le itumalo sa i ai le taulaga i aso ia, sa fesiligia nei lava i le masina talu ai e nisi o lou itumalo mea nei o vaafaila o lo o taula i tai o matou, toetiiti oo i le tai 10 vaafaila e toai taunuu i le taimi e tasi.

O lea la e faafesili atu ai i lau Afioga i le Minisita, ia o la e foi e faafogafoga mai lou itumalo, po o fea tonu lava e agai i ai le vaega lea, po o le Pulega o le Uafu, aemaise foi po o le tulaga i kamupani vaa, i le mafai lea ona afea le matou vaega lea e uiga i le taula ai o vaa ia faila, le au tafafao mai fafo. O le mea sili lava ma taua o lea ua faalogologo mai lou itumalo ma faafogafoga mai e tusa ai ma le vaega lea lau Afioga i le Minisita. E fia maua foi i ai se

malamalamaaga o lenei itumalo e tusa ai foi ma lea vaega, leaga o le tele ia o le aafiaga o le itumalo lenei, e uiga i mea nei o vaafaila o lo o faapea ona taula i o matou gataifale.

O vaega ia lau Afioga i le Minisita vaeatu lau Afioga i le Fofoga Fetalai e fia maua i ai sina malamalamaaga leaga o la e faafofoga lo matou itumalo e tusa ai ma le latou finagalo na aumai. Ne i meaane ua faapea le itumalo, ai lava o tautulemoe le tiakono toeaina i inei i le Maota. E leai o lea lava e momoli lo outou finagalo e tusa ai ma mataupu anoa ma le taua na aumai e le itumalo aua totonu o le Maota o le atunuu. Ia, a o le agaga maualuga, e matua lagolagoina e lenei itumalo Tulafono Tau Faaofi e pei ona aumai i luma o lenei Palemene.

Ia, o le tulai atu lea ma le agaga faaaloalo. Faafetai.

FOFOGA FETALAI: Malo faafetai saunoa. Ia, o le avanoa lenei o lau Afioga i le sui usufono mamalu mai Aana Alofi 2, lau Afioga Aiono.

Afioga AIONO TILE GAFA (Aana Alofi 2): Faamalo faafetai i lau Afioga i le Fofoga Fetalai mo le avanoa foi ua maua e lenei usugafono ma lenei itumalo. E manatu foi o lea ua saialo le taligasua a le Palemene ma lau Afioga aua le faaauauina o a tatou feau. Malo faafetai.

E faatalofa atu foi i le paia o le Maota, i le afio o lau Afioga i le Fofoga Fetalai ma le paia o lenei Itu aua lau Afioga i le Taitai o le Malo, le mamalu foi o le saofaiga aua lo outou nofo a Minisita ma le mamalu foi o Minisita Lagolago, aemaise foi o lenei talaga, le Sui Taitai ma le paia o sui usufono aemaise foi le maualuga o le tatou Maota aua le ee tapuai o Ofisa Sili o Pulega o Matagaluega, faapea foi lau Afioga i le Failautusi o le Maota ma lou auvaa.

E le tele lava se manatu lau Afioga, e manatu o lea ua manino lava ma malamalama le fesuaiga. O le vaavaai atu i ai, ia o lea lava tatou te ... e pei lava ona tuu mai le teuteuga o le Tulafono, o Mulifanua ma Salelologa. A o le aotelega lava o se vaai, o le Pulega o Uafu ma taulaga ma le Faalapotopotoga o Vaa. Ou te taua o le uso tuofe vaega ia e lua. Aua o Salelologa ma Mulifanua, a leai se uafu e leai se vaa, a lea foi se vaa e leai se uafu. A o le taua lenei o le tatou atinae aua le lumanai ma le gasologa lelei o le soifua o le lautele o le tatou atunuu aua mea nei o femalagaaiga. Ou te iloa o le tatou motu i Savaii, ia o Upolu atoa foi lenei, e fesootai o tatou aiga ma o tatou tagata. A o le faalogologo ma le matau lau Afioga i le Fofoga Fetalai i finagalo faaalua o le Maota i lenei taeao, e lagona lava le agaga faafetai i lau Afioga i le Minisita i le faatulai mai o le fesuaiga lea e pei ona talosagaina. Malo faafetai. E leai foi se vaai atu i ai o se suiga tele. Leai o le suiga faigofie. O le ala lea o lou fai atu o le uso tuofe, e faigofie ona ave i o lea foi o le a toe aumai i i tulaga uma e pei ona aumai. Ioe.

Na pau lava lea o nisi vaega sa laga i finagalo o sui usufono, lea la ua faafofoga lau Afioga i le Minisita. Ae pei o le isi lape lea e i ai, ia na ona avatu lava i luma, o lea e faafofoga lau Afioga i le Minisita, o le tulaga lea o le faatinoga o galuega ma le galulue faatasi. O lea lava e agiga i luma faiga faavae ma le mulimulitaia o Tulafono e limataitaiina ai a tatou feau. Ae pei o lea lava ou te talitonu o lo o fai pea feiloaiga a lau Afioga ma Ofisa Sili o Pulega o Matagaluega o lo o i lalo o lau vaaiga pe masina pe a. Ae o le agaga lena e tuualalo pea ona e afua mai luga le toa lea e i lalo. E pei ona maua i le tulaga e aliali mai i le uafu, aemaise lava Mulifanua ma Salelologa foi. O le a le mea e ala ai ona afua ia mea? Ou te talitonu a pasi le Tulafono o mea ia e tatau ona sailiili i ai ma vaavaai i ai. A o le tulaga lena e tatau ona silasila mamao i ai. E le aoaia foi e Laupua Tamafaiga i le tofa maualuga i lau Afioga i le Minisita ma le Malo, ae e tatau ona silasila totoa i ai. Afai sa silasila i se faaletonu, o le a se tulaga sa i ai le amataga mai i le taumafaiga o le uafu i lena vaitaimi ona fai lea o le fesuaiga, ia e faapena lava le tatou galuega, tatou te le tumau, e vaavaai po o fea le itu e lelei ai, ae tatou te le tusitusilima foi pe tatou te matau mea. O le suiga o le Malo ma le tatou... i lenei vaitau, ia o le tulaga lena, ae tatou te silasila mamao ma fetufaai, e avatu foi le fesoasoani ma le tuualalo a lenei Itu i mea e manuia ai ma atiae ai a tatou galuega.

E pei o le faamatalaga lena i lau Afioga i le Minisita ma lau Afioga i le Fofoga Fetalai, e tauala atu i le Afioga i le Minisita ma le Pulega o Uafu ma Taulaga. Ia e momoli foi le faafetai. Faafetai i le galuega a le Ofisa Sili o Pulega. E talitonu foi e pei ona tatou feiloai i le Pre-Sitting i le aso Gafua e le i auai mai le Afioga i le Ofisa Sili, ia talosia ia i le alofa o le Atua aua le mea o lo o aliali mai i fanau, ia alofagia e le Atua ia faafoi le soifua laulelei. Ae faafetai foi i le Pulega ma le galuega, e lagolagosua aua le galuega a lo tatou Malo, aua lau Afioga i le Minisita ma le Matagaluega. Ia o lea e matau atu o lea o le a toe foi lava mea a Kaisara ia Kaisara e pei o ia upu a le Tusi Paia a le tatou Alii Faaola.

Ia o outou mama na, o mama na i lau afioga e tusa ma lenei Tulafono lau Afioga i le Minisita, ia o lena ua taoto atu. E pau lava o lea se finagalo pasia ia tatou teuteuga ia o lena ua taatia atu se fautuaga. E silasila mamao i ai aua le agai i luma o ia foi aseta a lo tatou atunuu, i uafu faalotoifale ia i Salelologa ma Mulifanua.

Ae ou te le i nofo i lalo lau afioga i le Fofoga Fetalai, e leai e faaleo foi e lenei itumalo le agaga faamanuia ma le agaga faafetai i le toe saofaga mai mo le toe seei mai o le afioga i le Ao mamalu o Le Malo ia Tuimalealiifano Sualauvi II ma le Masiofo, ia aua lenei 5 tausaga. O mama na ia faamanuia le Atua i faiva ma tiute. E faafetai foi i le afio o le Kapeneta ma le afioga i le Palemia ia aua le finagalo mo ia valaauina.

Ia o se matou tala lea, fesoasoani atu i le tatou Tulafono e lagolagoina ma le agaga faafetai i le teuteuga faafetai.

FOFOGA FETALAI: Malo saunoa, faafetai foi mo le sao mo le tatou Tulafono. Ia o lea e matau atu o tulai mai le sui usufono mamalu mai i Sagaga 4. O lea e mumu mai lau moli. Tulai mai lau afioga.

Afioga TAGALOATELE PASI POLOA (Sagaga 4): Ia faamolemole. Faafetai mo le avanoa i lau afioga i le Fofoga Fetalai. Ou te manatu foi se i fai se sao o lenei itumalo e tusa ma le Tulafono Tau Faaofi ua folasia nei i le Maota.

E muamua ona faafeiloai atu i lau afioga i le Fofoga Fetalai, faapea foi le mamalu, le afio o le afioga i le Tamaitai Palemia. Afio foi le la Itu o le Malu i le Sui Taitai ia faapea foi ia sui usufono mamalu o le tatou Palemene i lenei taeao. Atonu e faafofoga mai foi lou itumalo i tulaga e pei ona i ai lenei taeao e fia fai ai se sao o Sagaga 4 e tusa ma lenei Tulafono.

Ou te muamua foi ona ou fia faafeiloai i lou itumalo le Afifio o Aiga, Tama a Alosina, Alo o Malietoa, Afifio foi Tilialo ma le Aiga Sa Tilialo, mamalu i le Maopu, Fetalaiga ia Luatua, Faletolu ma lona Gautaala. O paia ia o lo tatou itumalo.

E pei lava o tulaga masani, o aso faapenei e seasea o outou silasila mai o ou tulai atu ona o lea lava sa tuualalo mai ia lo outou fautuaga, aua le sii sooa le sa Tagaloa seivagana se mea taua e tatau ai ona e tulai. Ou te le o manatu la ou te teuteu lumafale i le faafofoga a le itumalo ae faia pea le lagona e pei ona i ai ia le tatou usugafono e pei ona i ai lenei taeao.

Lau afioga i le Fofoga Fetalai e lagona lava le faafetai e tusa ai ma lenei Tulafono ua folasia e le tatou Komiti. Faafetai tele i le afioga i le Minisita e a ia le Tulafono. Sa manaia lava le faalogologo i le saunoaga a le Minisita i le folasaga muamua ina ia se i tuu mai le avanoa, se i avatu se finagalo po o se lagona o sui usufono. Ia ae a i ai foi faatasi ai ma nisi o tau fia ulavavale i nisi fesili, ia e pei o lagona ia e tau fefe ai. Ia e i ai lava le lagona foi lea a faigata ona e saili se mea, pipii loa i ai. O lagona la na o Sagaga 4 o lou pipii e lagolago ma talia le Tulafono o se mea e taua lea. E talu ai o Sagaga 4 ia e le latalata ma e le malaga soo i le motu, ae o le agaga fiafia i le faataatia mai o lenei Tulafono, talafeagai e pei ona faitau i ai i mataupu e pei ona aumai i lenei taeao faapea foi le taimi ua sola i le tatou aiaiga.

E i ai lava le lagona e pei ona matau atu i uafu o lo o faataoto ai lenei Tulafono o Mulifanua ma Salelologa. Ia ona ou manatu lea ma ou fiafia lava pe a tau le isi uafu lea i Mulifanua ona e i ai le upu foi lea e masani ai e i ai le laau e lua lanu o lona fua. E sui usufono i Sagaga ae tele lava le pito faa-Aiga i le Tai.

Lau afioga i le Fofoga Fetalai ou te fia faapipii i le talosaga a Aiga i le Tai e tusa ma lo matou uafu o lo o i ai i Manono. O lea foi sa silasila lau afioga ma le mamalu o le tatou vaega, i le taimi na o tatou pasia ai lea vaega, pe a oo ina sousou ia le sami, ia e tatau ona tuuina atu. Faafetai lava i le saunoaga a le Minisita, e le i taua ua Koviti ia le uafu a matou i le Aiga i le Tai. Ae e

faafetai e tusa ma ia tulaga, e lagolago e tuuina atu i le talosaga a le sui usufono a le Aiga i le Tai e tusa ma lenei faamoemoe. Ae e matua lagolagoina tele e Sagaga 4 le faamoemoe ma le Pili ua aumaia mo le suiga o le a i ai le tatou Matagaluega, ou te iloa o se auala tataua lea ma matagofie pe a tasi lava le vaega e tataua ona i ai le tofa tatala a le Matagaluega faapea foi ia le afioga i le Minisita, e tusa ai ma nisi o suiga, sui mai i le lelei i le mea e sili ona lelei, e pei ona agai i ai le faamoemoe o le tatou Faigamalo mo lenei vaitau.

O se lagona vaivai lea o le itumalo, e fai lou leo e fai ma sui o le itumalo. E pei lava ona silafia o le itumalo o Sagaga 4, e toatele ia o HRPP, ou te tau le talia foi nisi o vaega o... fai lava le mea o lo o i ai le musumusuga i le sui usufono o Sagaga 4 e pei ona i ai lenei vaitau ma le valaaulia, e tusa ma galuega. Ia o le tatalo lau afioga i le Fofoga Fetalai, ia foai mai pea e le Atua ana faamanuiaga i lau afioga faapea le afio o le Tamaitai Palemia, faapea foi lea Itu o le Maota, manuia le tatou Fono.

FOFOGA FETALAI: Malo, faafetai, ia ua faamalo saunoa i le tatou Maota. Oi ia o lea e mataua atu o lea e fia tulai mai ia le sui usufono... Ia tulai mai le sui usufono o Falelatai ma Samatau o lea e mumu mai le moli.

Afioga LUPEMATASILA GALUMALEMANA TOLOGATA TOGIA TILE LEIA (Falelatai ma Samatau): Faafetai i lau afioga i le Fofoga Fetalai mo le avanoa. Ia e muamua foi ona faapai atu i le afio o lau afioga i le Fofoga Fetalai, ia faapea foi le paia maua o lenei Palemene. Afio lau afioga i le Tamaitai Palemia, le afioga i le Sui Palemia, o le aiga Minisita, Minisita Lagolago ma le paia o le Faigamalo ma le Pulega.

Ia liliu mai foi i lenei Itu, afio atu le afioga i le Sui Taitai, ma usufono uma o lenei Itu e agaia ia le tatou Malo. Ou te fia faapai foi i le tapuaiga a lo tatou atunuu, le tapuaiga a le Ao mamalu o Le Malo, ia faapea foi le paia i Aiga, Tama ma o latou Aiga, o Aiga ma a latou Tama, le Usoga a Tumua ma Pule, Ituau ma Alataua, Aiga i le Tai ma le Vaa o Fonoti. Ia ae tainane foi le tapuaiga a le aufaigaluega tofofi a le Atua o lo o faanonomanu aua se manuia o le tatou atunuu.

Ou te fia faapai foi i le tapuaiga a si ou itumalo i le Paia o le Falefitu o le Atitagaloa, le Aiga tau o Aana, le Afio o lau Afioga i le Matua Moepo, lau afioga Fasavalu ma le paia o le Aiga ia Salu ma Auvaaipeau. O le paia foi i le Tauso a Alii ma Tama a Tausala, Afio lau afioga i le Matua o Aiga. Afio lau Afioga Taiivao na falefia i ai Aiga. Afio le afioga ia Tagaloaipata o le Papa, Alalatai le mamalu i Galuefa ia Falelatai ma le tagata o le Vavau. Le Vae o le Nofaafia ma le Tula ia Salogo.

Ia ae tainane foi ia si ou nuu i Samatau, Paia aua le Afifio o Falefa o Usoalii, Fiamē ma le Gafa, Alo o Tamaalelagi, le Maopu o le Tuiaana, ia ma le mamalu ia te oe le saofaiga Leulumoega. Ia tapuai maia ae se i taumafai so

tatou sao, ia i lenei foi Tulafono ua i luma o le Palemene. Ae le i oo atu se tala a lenei itumalo i le Tulafono e pei ona talanoaina e le Maota, ou te fia faaaogaina lenei avanoa taua, e ui ina tuai, ia ae o se avanoa ua maua, o le avanoa lava o le avanoa.

E fia molimoli atu le agaga faafetai tele, a lenei itumalo. E manatu e i ai se taimi pau foi se tofa ma se faautaga a le itumalo, to se matupalapala a lau afioga i le Tamaitai Palemia ma le Faigamalo. A o lenei lava avanoa ua maua, e fia faaleo atu ai e le sui usufono o le itumalo le agaga faafetai tele. O le mea moni, sa matematelima faiva o le tama a le Aiga Tauaana, ia faapea foi lenei nuu ma le itumalo, i lau faiga filifiliga e pei sa feagai ai. Ua logomaua foi le matou faalogo ma le faafofoga, tala e ave e le matagi, tulaga sa i ai le faiga filifiliga a le Malo. Ae sa nofo tatalo foi ma nofo anapogi lenei nuu ma le itumalo, ia aua le faamoemoe. Peitai o lea ua ave ave suaga a le vaatele, i le sailiga o le tofa ma le faautaga i lau afioga i le Tamaitai Palemia ma le Faigamalo, o lea ua outou tusiaao i le tama a le Aiga Tauaana, e toe faaaauaina le isi 5 tausaga o le Nofoaiga.

Ua maea ona malele le Afioga i le Ao mamalu o Le Malo i le aso ananafi, e le toe tele foi la se matou faamatalaga. Ae e na o le agaga faafetai ma le faamalo, e fia molimoli atu i le Faigamalo. Faafetai o la outou pule lea.

O le aso ananafi, sa nofonono lava le sui usufono o Falelatai ma Samatau, ia a o felafolafoai foi ia le tatou Maota, amata mai lava i le taeao i le faatautoina o le afioga i le Ao mamalu o Le Malo. O le manaia ia o upu tomua o le lauga a le Patele, 'Amuia e matitiva i le agaga, aua e fai mo latou tofi le Malo o le Atua'. Ae fai mai le manatu autu o le Tusi Faitau Aso o le Au Faitau Tusi Paia o le Lalolagi i lenei vaiaso, ia fesootai Malo. O le faaaliga o le filemu. A o le manatu autu o le aso ananafi, Filemu i le talitunuina o le Alii. Sa ou nofonono lava ananafi e ese le pai mai o le agaga o le Atua.

Tofa Hon Olo Fiti Afoa Vaai: Lau afioga i le Fofoga Fetalai....

FOFOGA FETALAI: Ia, faamalie atu i le sui usufono mamalu, se i tulai mai le afioga i le Minisita.

Tofa Hon Olo Fiti Afoa Vaai: E faamalulu atu lava i le sui usufono mamalu o saunoa. A o lea ua ou matau atu o le a toe agai i tua ia le tatou Fono. O lea ua maea ua alu foi futia i le aso ananafi i le tatou mataupu, ia ma ua toafilemu foi ananafi ma le tulaga o le mataupu sa fai ai.

A o le taimi lenei, o lea e tatou te i luga o le Tulafono e pei ona taoto atu nei, faamolemole, talosaga atu i lau afioga i le sui usufono mamalu, se i agai tonu mai i i le tatou Tulafono e le o toe mamao foi le tatou taimi, ma le faaaloalo.

FOFOGA FETALAI: Ia, o lea ua fesoasoani atu ia le Minisita, ia ona sa ou faatali lava toeitiiti lava oo i se taimi e fai atu ai se tala a le Nofoa, leaga o lea ua tea le aso ananafi. O le aso lenei, o Tulafono o Taulaga lea e tatou te talanoaina. E le toe manatu foi le Maota lenei e tatou te toe tepa i tua. E pei ona outou faafofoga i le tatalo i le taeao, ua fou le aso lenei, ua fou foi meaalofa a le Atua mo tatou i le aso lenei. E fou foi mea e tatou te talanoa ai i le aso lenei.

O le mea lea ou te fesoasoani atu ai i le sui usufono mamalu, o le faaiuga a le Nofoa, agai sao i le tatou Tulafono.

Afioga LUPEMATASILA GALUMALEMANA TOLOGATA TOGIA TILE LEIA: Faafetai i lau afioga i le Fofoga Fetalai, o le a usitaia foi le finagalo o lau afioga. E leai e pau lava le agaga lea sa taumolimoli atu, e i ai le talitonuga, a nofo fale i o tatou finagalo le finagalo o le Atua, ia ona maua lea e lenei Palemene le toafilemu ia ma le manuia. E ui i lea, o lea o le agai sao loa se manatu i le Tulafono

FOFOGA FETALAI: Ua maea upu o le aso ananafi, agai i le Tulafono.

Afioga LUPEMATASILA GALUMALEMANA TOLOGATA TOGIA TILE LEIA: O le agai i le Tulafono. E momoli atu le agaga faafetai i lau afioga i le Minisita, ia e tusa ai ma le taulagalaga i mea lelei i suiga o lenei Tulafono. Leaga o la e faafogafoga Samoa, ae o nai mea lava e fia faaali ai manatu, ia e leai o lea lava sa manuia ia le Kamupani Vaa, ma le Kamupani o le Uafu, ia a o faagasolo i le la Paeaiga ua tuanai atu.

Ae faafetai, faafetai o lea ua ae se tofa i lau afioga i le Minisita, e faia ia suiga pe afai ua talafeagai ma lenei foi taimi. Ao se tuualalo a lou sui usufono, o lea e matau atu, na ala foi ona fai suiga i lenei Paeaiga ua tuanai atu, ona sa i ai foi faafitauli na tulai mai. O lea foi la ua matauina le tulaga lelei e le gata ua oo i ai le Kamupani Vaa ma le Kamupani o Uafu ma Taulaga, ina ua faatino na suiga tetele, ia a o lea foi ua oo mai i nei taimi, o lea foi o le a toe faafoi i tua.

O le manatu e tutupu mai, ma fai i ai se fesili, o le a le mafuaaga o le faaletonu? E faaletonu ea ona o le faiga faavae? Pe faaletonu o tagata e faatinoina le faiga faavae? O le mea lea ou te pikia i faamatalaga ma molimau ia e aumai, na matua siitia le tulaga o uafu na i ai, ina ua tuufaatasi ma le Kamupani Vaa. Ae e tasi lea matau a le...

Tofa Hon Olo Fiti Afoa Vaai: Lau afioga i le Fofoga Fetalai, e na o si mea lea e fia faasao...

FOFOGA FETALAI: Ia, saunoa lau afioga i le Minisita...

Tofa Hon Olo Fiti Afoa Vaai: Na saunoa le sui usufono mamalu, o lea sa e faafogafoga i nisi sui usufono tuai o le Maota, na molimauina uma lava le faaletonu sa i ai na fai ai le suiga lea, i le 2014 sa o matou i ai uma ma sui usufono mamalu nei sui sinia o le Maota lea. Ma e o le mea foi lea ua i ai, o le mea foi lea e i ai, e le o alu i tua. O lea ua o tatou agai i luma e faasao uma lava le tulaga na afua ai le suiga lea.

O le mea muamua o le suiga, ina ia fesoasoani mai le isi itutino a lo tatou Malo i i i le vaega lea e pei ona faaletonu ai le tatou Pulega o Uafu ma Taulaga. O le tulaga lena. O le isi tulaga, o le tatou toe o e tulituliloa ia aiaiga o le Tulafono e pei ona faatulafonoina ai Pulega taitasi. E pei o le tulaga lena, e faamalulu atu ai i le sui usufono o lea e i le tulaga e pei o le a see ese lava ia le tulaga i lana matau, ia ae o matou e le i matau sa o matou i ai tonu lava i le taimi lea, sa lotea ai le mataupu lea ma le faaaloalo.

FOFOGA FETALAI: Ia masalo le sui usufono mamalu masalo i lenei taeao atoa i le saunoaga a le Minisita e manino lava mea uma. E pei o itu ia ua e toe oo i ai, ia ae ua uma foi ona saunoa i ai le afioga i le Minisita. E manatu foi o le faasaoina lava o le tatou taimi, ae ou te talitonu lava, o lea ua maea ona fai le tali a le Minisita, o le tali foi lena a le Malo i le tatou mataupu.

Ia se i tulai mai le sui usufono mamalu.

Afioga LUPEMATASILA GALUMALEMANA TOLOGATA TOGIA TILE LEIA: Faafetai i lau afioga i le Fofoga Fetalai, ia ne i faitau eseese Tutuila ma Ape, ae ou te le i fai atu a mea e leai ni faaletonu o le Kamupani Vaa po o le Kamupani e vaaia le Uafu. O le ala lena na ala ai ona sui ia le faiga faavae ona o faaletonu na i ai.

A o lea ou te faafetai atu, le tele o suiga lelei lea na tulai mai ina ua fai na suiga i faavae. O lea ua toe faafoi i tua i le faavae tuai, o lea e momoli atu le agaga faafetai i lau afioga i le Minisita, e le o avatu se faitioga. A o nai tuualalo lea ua avatu ona o lea ua o tatou i ai i mea o faiga faavae, o le isi itu o lea e agai atu ai se fautuaga, i lau lava matau a o faigaluega foi i le Malo, e ala ona faigata ia tamai pisinisi ia e tau fai nei e le Malo, o le Economy of Scale. E fai lava si laitiiti, laitiiti le Kamupani Vaa, laitiiti le Pisinisi o Uafu, laitiiti le SSS, etc.

Ae o se tuualalo lea e avatu ma se motugaafa, e lagolagoina e lenei itumalo le suiga o le Tulafono ua aumai. Ae vaavaai i le aotelega, ia po o se tasi lena vaega e tatau ona vaavaai i ai le Faigamalo ina ia mafai ona tuufaatasi ai nisi o Faalapotopotoga o i ai, ina ia mafai ona tuu i luga ia le Economy of Scale, e penefiti ai ia operations ma tulaga faapena, aua e mafai ona share costs and resources.

Tofa Hon Olo Fiti Afoa Vaai: Lau afioga i le Fofoga Fetalai, ia o le a toe faasao le mea sese.

FOFOGA FETALAI: Se i tulai mai le afioga i le Minisita...

Tofa Hon Olo Fiti Afoa Vaai: O le tulaga lea e pei ona ou fai atu, o lea e tau tuituliloa aga o le Tulafono. E le gata i Tulafono iinei, ao Pulega ia e 2, e mulimulitaia i aiaiga i lalo o International Tulafono a le IMO, le International Maritime Organisation Regulations. E mulimulitai i ai le 2 lea. E le mafai ona o tatou suia ma fai e tatou se tonu o mea ia, leaga e galulue International ia Bodies ia e 2.

O le mea lena e le mafai ai ona i ai lava se tuufaatasiga. E pei lava ona ou fai atu i lau faamatalaga, o lea e tau tatai mai ia faiga faavae ma mea uma ia, i lalo o Principal Acts ma Tulafono Faava-o-Malo ma le faaaloalo.

FOFOGA FETALAI: Ia, ua manino mai lau afioga i le sui usufono mamalu, ia ua talanoa mai le Minisita i le faatulagana o le Tulafono.

Afioga LUPEMATASILA GALUMALEMANA TOLOGATA TOGIA TILE LEIA: Faafetai, o le tuualalo lea na avatu, e le o se... o le tuualalo ma le fautuaga e vaai lautele i ai le Malo. Afai e le talia fautuaga ia e avatu, ia faafetai. E le mafai ona o matou nofonofo e avatu mea e manatu e manuia ai lo tatou Malo, ae faafetai, faafetai i lau afioga i le Minisita mo le tau faamalamalamaina mai o nai vaega ia. O Tulafono a tatou e pule ai tatou poo ai e tuu i ai le vaaiga ae comply i Tulafono Faavaomalo.

Ia pau na o se manatu lau afioga i le Fofoga Fetalai, ia manuia tele lau afioga i le Fofoga Fetalai ma le mamalu o lenei Palemene, ia a o feagai ai ma le tatou Fonotaga faafetai.

FOFOGA FETALAI: Faafetai, malo faafetai. Ia o lea ua matau atu ua maea saunoa sui usufono.

Afioga Fuaava Suluimalo Amataga (Aleipata Itupa i Luga): Lau Afioga pe maua se avanoa faamolemole...

FOFOGA FETALAI: Oi ia, o le avanoa lea e tasi mo lau afioga i le sui usufono o Aleipata Itupa i Luga

Afioga Faleomavaega Titimaea Tafua (Aleipata Itupa i Lalo): Lau afioga i le Fofoga Fetalai, ua fai si leva ona oomi atu le moli lau afioga.

FOFOGA FETALAI: Oi ia o le faalavelave e le o iloa atu i le ao o le Minisita. Ia o oulua lava o le auso. E i ai le manatu, o le a faamuamua i, ona faaiu atu lea i lau afioga.

Afioga Faleomavaega Titimaea Tafua (Aleipata Itupa i Lalo): O lea o le a faamuamua atu lau afioga pe a tusa ai ma lou finagalo.

FOFOGA FETALAI: Ia malie Itupa i Luga o le a tuu atu i le Itupa i Lalo e saunoa muamua mai. Saunoa lau afioga.

Afioga FALEOMAVAEGA TITIMAEA TAFUA (Aleipata Itupa i Lalo): Faafetai lau afioga mo le avanoa. Faafetai foi i lau afioga i le Minisita e tusa o le Tulafono. A o lou tulai atu, e le o i ai i totonu o le Tulafono, pepa o le tatou galuega o le aso ia se vaega o le a ou taua. Ae na ona ou tulai atu, ona o le upu uafu lea e faaoga, o lo o i ai le uafu i Satitoa i Aleipata. O lea e momoli atu ai le faamalo ma le faafetai tele i lau afioga i le Minisita e pei ona e taua ia vaega o atinae o le a faatino e le uafu lea o matou. E leaga e faigata e lelei le faafogafoga mai o le matou itumalo, o lea e fai atu se leo leaga o lea ua i ai le upu uafu ua faaoga lau afioga.

E moni lau afioga o lea na e saunoa mai ua talia le Pre Sitting i faamaumauga a le tatou... ae malie lau afioga, e le o faafogaga mai ia si o matou itumalo. Ia o le tatalo lea ma le agaga faafetai i lau afioga i le Minisita e tusa ai ma le fesoasoani mai i le atinae ua leva ona taatia. Ua ova i le 15 tausaga e le o toe faaogaina. Ae faamanuia le Atua i lou alofaiva i feau ma tofiga, ia e lagolago foi e lenei itumalo ia le Tulafono ma le agaga faaaloalo.

FOFOGA FETALAI: Ia malo saunoa lau afioga i le sui usufono mamalu Itupa i Lalo. Ia lau afioga Itupa i Luga Aleipata, le sui usufono mamalu.

Afioga FUAAVA SULUIMALO AMATAGA (Aleipata Itupa i Luga): Faafetai i lau Afioga i le Fofoga Fetalai mo le avanoa. Ia o le faaaloalo foi lea na tuuina i lou uso a sui usufono, ia e tausoa lava ia le ma avega e mama ai foi.

Ia ae o le avanoa taua lenei, ia e faafeiloai atu ai i lau afioga ia aemaise ai foi le mamalu o le Maota, le afio o lau afioga i le Tamaitai Palemia, aemaise foi ia le Sui Palemia, Vasega Minisita o le Kapeneta, Minisita Lagolago, ia aemaise foi lenei Itu le afio atu o le Sui Taitai, mamalu o sui usufono o lenei Itu o lo o agaia ia le tatou Malo . Ia e faafeiloai atu foi i le paia ma le mamalu o Ofisa Sili o Pulega o Matagaluega, Faalapotopotoga, ia aemaise ai foi le Failautusi, Sui Failautusi ma le Ofisa nei, ia ma le mamalu o Samoa ua potopoto i totonu o le Maota.

E i ai le manatu o le a le oo lava se faamatalaga i paia o Samoa, aemaise foi le faafogaga a si ou itumalo, ia e le toe tau faamapueina i se tala a la outou sui usufono. O paia lava lea e faasino i le Tuiatua faanofonofo

Alalamalae ma Saleaamua, ia ae taumafai atu ia se motugaafa a lenei itumalo, ia e tusa ai foi ma le Tulafono Tau Faaofi o Pulega o Uafu ma Taulaga ua i lumamea nei.

Ia o lea na manino le faaaliga a lau afioga i le Fofoga Fetalai ia o tulaga foi lea i tatou Pre Sitting. Ia sa i ai foi ni manatu sa faaaliga ai i le Tulafono Tau Faaofi. Ia ae sa i ai foi nisi o vaega sa le taua ia o lea la na manatu ai, e maua pea se avanoa e tuuina atu ai pea i luma o le tatou Maota Fono. Ia o lea ua manino i le saunoaga a le Minisita, ua tali mai foi i nisi o faafesili, ia sa laga foi e sui usufono mamalu o le Maota.

O lea foi ua matau atu i tulaga o vaegatupe i le fetuunaiga ma fesuaiga i le transfer ina ia o aseta ia ma vaega o le aufaigaluega. Ia faafetai o lea ua manino le tulaga lea, aemaise foi le tulaga i le fesuaiga o aseta aemaise o eleele e aafia ai. Ia atonu o lo o manino foi i le saunoaga a le Minisita, o lea foi e faafogafoga mai ia Ofisa Sili o Pulega o nei Faalapotopotoga ma Pulega, i vaega ia ia aua e pei o uafu ma taulaga e na o vaega ia e pipii ai vaa. Ia e i ai lava ma o latou... for security i latou buffer zones ma vaega foi ia, ou te iloa e ta aofia uma i totonu o le siomaga lea mo taulaga ma uafu.

E momoli atu ai le faafetai i lau afioga i le Minisita aemaise foi le tapuai mai o Faaluuluga ma Taitai o Pulega o le Uafu ma le Faalapotopotoga o Vaa, ia i le tulaga o fesuaiga. E faamuamua atu se faamatalaga a lenei itumalo, ia o lea ua manino nisi o tulaga sa tau avatu ai se manatu, ia ae lagolago le itumalo i le fesuaiga lea ua i ai nei. O mea lelei uma lava, o a foi ni fesuaiga sa fai foi i le Paeaiga ua tuanai, o lena ua manino le saunoaga a le Minisita, ia sa fai foi ona o fuafuaga lelei uma. Ia o lea foi ua vaai i lenei taimi, ia ua taumafai e toe fai se leleiga e sili atu.

Ae e toe tuu atu lava sina faamatalaga faamolemole lau afioga i le Fofoga Fetalai, ia i le tulaga lea i le uafu lea i Aleipata faamolemole lau afioga, semeamanu lava lea e tatou te i ai i le Teuteuga o le Tulafono. Ia pe le tuu atu ai se fuaiupu foi lea i le Teuteuga lea i lo le toe faatali foi se i toe aumai i se isi Teuteuga. E toe faaopoopo i ai le Uafu i Satitoa i Aleipata. O lea ua saunoa manino ia lou uso a sui usufono, le Itupa i Lalo i Aleipata, ia e pei o le naunautaiga lea, leaga e vaavaai atu i le suiga o le Tulafono, e pau uafu ia ua faaopoopo i totonu o le schedule lea a le vaega 5, ia na o Mulifanua ma Salelologa. Ae na o se tuualalo, ae le pe maua loa lenei avanoa e tuu atu ai ma lea Teuteuga, ia pasi atoa loa ma le Tulafono. I lo le faatali foi e aumai i lea tausaga ua faaopoopo ai ia Satitoa, le uafu i Satitoa. Ia na o se tuualalo foi lea, ae e i ai ma lona vaega taua. I le faaiuga o le vaiaso o le a fai le lotu tamaiti, sa i ai se faalavelave na tulai mai i tua i si o matou itumalo. Atonu o lo o silafia lelei e le Afioga i le Minisita o Leoleo ma Fuimu ma Faalavelave Faafuasei. E i ai la tulaga o lea ua manatu, e na ona faataatia atu pea, e le faapea o le fuafuaga mo le Tulafono lea ua tapena nei. Ae mo faiga faavae mo le agai i luma aua le vaai lautele, i le malupuipua aemaise o le ola saogalemua o le mamalu o si o tatou atunuu.

Na i ai se tasi o atalii o lenei aiga ma lenei nuu, o le aulama, e foi mai ua le maua. Sa logo le Ofisa o Leoleo, sa fai le latou taumafaiga, ae pe i ai lava nai itula ia, pe tasi lua, ia tulaga foi lele i le vaa faaola, ina ia vave. Atonu ai pe ua tafea le tama po o le a lava le tulaga na i ai, pei o lea na logo mai loa i lenei vaveao, alu lenei taeao o saili. Ae ou te iloa po o se taimi i le 10:00 i le taeao, faatoa maua ai.

O atugaluga o lenei itumalo, o lo o i ai le uafu i Aleipata, pe a pe a i ai se fuafuaga, e tapena se vaega laititi lava, e faaaoga, o lo o i ai le Ofisa o Leoleo i Aleipata. Ae tau ina faaaoga i ai le latou vaa faaola, tulaga faapena, e pei e anchor ia vave ai foi. Aua o isi taimi e tau faatali e toso atu le vaa i nei i Apia. Ae pei o le mamao o ala, pei o le naunautaiga foi lenei o lenei itumalo Itupa i Luga ma le Itupa i Lalo o Aleipata, ia i ai lava le tele o auunaga nei i totonu. Aua o le tausiusiui lava lea o le motu nei i Upolu. E fai si faigata o le fuimu, o tulaga faapena o vaa o leoleo. Ae o le measili faafetai o la ua i o le Ofisa o Leoleo, ou te iloa foi la, o lea foi ua tapena atu le Pulega o Fuimu ma tulaga faapena mo so latou ofisa i o. O le a galulue faatasi foi la mo le faaleleia o le uafu i se taimi o i luma, pe a faapea ua tautuauega mo le tapenaga o le Tulafono lea ua opea i le Maota. Ona, i le tala faasolopito lava ia o Aleipata, ua toatele turisi, o lea ou te mataua, aua o le tele foi o taimi, o le vaa foi o lenei aiga e tele ina faaaoga e leoleo, e sue ai turisi.

O isi sa tafefea mai i le Tosua i Lotofaga, o isi o Lalomanu, o papalagi, o Iapani o Saina. E tele lava tulaga faapea sa tulai mai. Ae faafetai o lo o i ai le vaa a lenei aiga sa tele lava ina faaaoga e malu o le Malo. Ae pei lava e tasi lea o tulaga e fesoasoani tele pe a faapea e faamautu le uafu lea i Satitua mo lea auunaga. Ona o tulaga o faafitauli le maalofia ua faapea ona tulai mai i le tuana'i.

Ae tapenapena i ai lo tatou sa i le agai i le lumanai ma tulaga faapena. O la foi la ua maea i le weekend lea ua tea, ona teuina le atalii foi, po o le alo o lenei aiga. Ma o le faamaisega foi lenei e tuuina atu i lo matou aiga ma le nuu ona o le faalavelave ua tulai mai. Ia e fai toatasi lava le pule faitalia a le Atua.

O lou iloa ua maea vaega o se faamatalaga i le Tulafono Tau Faaofi. Ae ou te le i saofai i lalo, ia na ona faaopoopo atu o ni moomooga alofa ma faamanuiaga foi i le Afioga i le Tuiaana ma le Masiofo, e tusa ai foi ma lo oulua valaauina e avea ma Ao o le tatou Malo. Ia manuia tele lo oulua nofoaiga aua tiute tauave, ia manuia Samoa. Ia manuia lenei Maota Fono lau Afioga i le Fofoga Fetalai, manuia le tapuaiga a si ou itumalo. Soifua.

FOFOGA FETALAI: Ia malo saunoa i le sui usufono mamalu. E talitonu o lea ua maea saunoa sui o le tatou Maota. O le mea lea o le avanoa lea i lau Afioga i le Minisita pe a i ai se isi mea e saunoa i ai.

Tofa Hon OLO FITI AFOA VAAI: E momoli atu le agaga faafetai ia outou afioga i sui usufono mamalu, e tusa ai ma outou finagalo faaalua foi i lenei Tulafono taua, e pei ona i ai i le Laulau-a-Fono. E na o ni vaega lava ia, ona o le tele lava o saunoaga, o tuualalo lava e faaleleia atili ai le tatou Tulafono. Ae vagana ai nisi o vaega, e fia oo atu i ai lau faamatalaga e le umi.

E taua tele le tulaga le sa saunoa i ai le sui usufono mamalu o Aana Alofi 2, i le Matagaluega ma tagata faigaluega e oo mai foi i le Minisita. E ao lava ona valalata le tulaga o le galulue faatasi. O le tulaga lea e i ai a tatou Pulega ia e lua, o le fealofani ia i le faiga foi o le latou faaiuga e pei ona i ai. O Pulega foi nei, o lau galuega muamua lava lena sa faatino, o le aumaiga i totonu o Pulega, e faale-aiga la matou faasoa ma matou galulue faatasi, lea e i ai le tulaga lea. E le o i ai lava se tulaga o va ai le fogavaa i Pulega ia e lua i fesuiuga ia. E pei ona avatu lau faamatalaga ua malilie faatasi uma, e toe faafoi lava e tuliloa le tulaga o le faatinoga o Tulafono.

O le a ou amata atu ia i le sui usufono mo Aleipata Itupa i Luga ma le Itupa i Lalo. Ia a oulua afioga i le tulaga o Satitua, e na o le lua lava a tatou uafu ia e avatu i le Tulafono Tau Faaofi, e na o Salelologa ma Mulifanua. E na o le pau lena o uafu e lua, sa i lalo o le vaaiga a le Pulega a tatou Kamupani vaa. A o isi uma lava uafu, o lo o i lalo lava o le Pulega o Uafu ma Taulaga.

I le tulaga o vaa faila e pei ona taua e se tasi o sui usufono mo Gagaemauga 2, o tulaga o vaa faila, e aumai le talosaga i le tatou Pulega o Uafu ma Taulaga e ui mai i le Matagaluega o le MFAT. O lena e aumai i ai, ma avatu ai le faatagana e agai mai ai i totonu o Samoa. A taunuu mai la, e faasasao lava i Apia, fai le siaki faale-tulafono a le tatou Matagaluega o Tiute ma nisi foi o Matagaluega e aafia i i, i le siakiina o vaa ia e agai mai atunuu i fafo. Ona faapena foi lea ona avatu i ai le pemitia, po o fea lava o Samoa e fai ai le faatagana lea, i le tatou Matagaluega o le MWTI.

O lo o i ai a tatou security lau Afioga i le sui usufono mamalu i luga o uafu. Ma ou te talitonu lava e leai se tulaga e faapopoleina ai, ia le vaaia lelei o a tatou meatotino.

E pei ona saunoa foi le sui usufono mo Vaimauga 1, i ni penefiti a e o lo o galulue, lea o le a transfer, pe aiga faatasi foi ma le saunoaga a le sui usufono o Falelatai ma Samatau, i le tulaga foi lea o se Economy of Scale, i tagata faigaluega. O le tali o lea fesili lau afioga i le Fofoga Fetlaai ma sui mamalu, ua uma, ua faamaea ona totogi ia tau, benefits a le aufaigaluega sa i ai i le tatou Pulega o Vaa, ma o la foi e avanoa e galulue i lalo i le Pulega o Uafu ma Taulaga, i le va lava lea o Mulifanua ma Salelologa.

E pei lava ona ou fai atu o Aiga i le Tai ma le latou fuafuaga i le uafu lea. E le o i ai i lalo faale-tulafono le aumaiga o le uafu lea a Manono. Aepeitai o lea sa ave lava le tuualalo i le tatou Pulega ina ia tuu ai i totonu le uafu lea. E moni le saunoaga a le Sui Fofoga Fetalaai, i le va lea o Manono-Tai ma

Manono-Uta, e ao foi ona i lalo faale-tulafono i aiaiga ma galuega faaleleia a le tatou Pulega o Uafu ma Taulaga.

I le tulaga lea e pei ona aumai foi le tuualalo foi a le sui usufono mamalu a Alataua Sisifo, faafetai tele, e moni lau afioga i le tulaga lava lea ona o meatotino, i le silasila lena a le autausitusi ma le ausuetusi. Ae aua le faapopoleina lau afioga i le sui usufono mamalu. O le tulaga lava ia i aseta nei, o aseta lava ia mai i le amataga, o aseta sa i lalo o le tatou Pulega o Uafu ma Taulaga. Ona fai loa lea o le suiga lea o le suiga lea na fai, ua faasee atu i ai le tatou Pulega o vaa. O lea la ua toe faafoi lava ia mea a Kaisara ia Kaisara e pei ona saunoa se tasi o sui usufono. A o le agaga lava ia e pei ona i ai le suiga lea e pei ona ou talanoa soo atu ai, e faaeteete lava i le tulaga faale-tulafono. Ina ne i afaina mai se vaa e agai mai i fafo, e saisaitia lava lo tatou Malo pe afai e le o lana matafaioi lea, i le tulaga lena. Ou te talitonu lau Afioga i le Fofoga Fetalai, o le tali atu lea i nai isi o faafesili.

E fai ai au ma sui o le Pulega nei, Pulega a le Kamupani vaa ma le tatou Uafu ma Taulaga, e momoli atua i le faafetai ia outou afioga i finagalo faaalua, e fesoasoani e faaleleia atili ai le tatou Tulafono Tau Faaofi.

E momoli atu lau faafetai ia oulua Afioga i Ofisa Sili o Pulega ia e lua, ia faapena foi le aufaigaluega atoa mo le lava onosai, ma le tulaga ua outou faaeaea ai, ma faaleleia atili ai ia Pulega e lua, e pei ona tulai mai i lenei aso. Ae faafetai tele lau Afioga i le Fofoga Fetalai, manuia lo tatou aso.

FOFOGA FETALAI: Ia faafetai malo saunoa i lau Afioga i le Minisita. Ou te talitonu foi o lea ua malamalama nisi o finagalo faaalua o le Maota i lau faamalamalama aua lava lenei Tulafono Tau Faaofi.

Na faamaonia le lafo ma faitauina le Tulafono Tau Faaofi o Teuteuga o le Tulafono o le Pulega o Taulaga 2022 i lona faitauga faalua.

TULAFONO TAU FAAOFI O TEUTEUGA O LE TULAFONO O LE PULEGA O TAULAGA 2022 – iloiloga auiliili

FOFOGA FETALAI: E tusa ai ma Tulafono Tumau 104, e amata le Iloiloga Auiliili i le Fuaiupu 2.

FUAIUPU 2: Ua teuteuina le fuaiupu 17.

Faamaonia.

FUAIUPU 3: Ua soloia le fuaiupu 17A.

Faamaonia.

FUAIUPU 4: Ua teuteuina le fuaiupu 64.

Faamaonia.

FUAIUPU 5: Ua teuteuina le Faamatalaga 1.

Faamaonia.

FUAIUPU 6: Aiaiga faasaoina ma aiaiga tau soloaiga.

Faamaonia.

FUAIUPU 1 MA LE IGOA.

FUAIUPU: Igoa puupuu ma le amataga.

IGOA: Teuteuga o le Tulafono o Pulega o Taulaga 2022.

Faamaonia.

Na faagasolo le Tulafono Tau Faaofi o Teuteuga o le Tulafono o Pulega o Taulaga 2022 e aunoa ma se Teuteuga.

**TULAFONO TAU FAAOFI O TEUTEUGA O LE TULAFONO O
PULEGA O TAULAGA 2022 – faitauga faatolu**

FOFOGA FETALAI: Ou te tapa lau Afioga i le Minisita mo Galuega, Felauaiga ma Atinae Eseeese Hon Olo Fiti Afoa Vaai.

Tofa Hon OLO FITI AFOA VAAI: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Pulega o Taulaga 2022 i lona faitauga faatolu.*

Faaluaina e le Sui Palemia, Minisita mo Faatoaga ma Faigafaiva ma le Minisita mo Pisinisi, Alamanuia ma Leipa.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.

FOFOGA FETALAI: Ia o lea ua tatou taunuu i le faaiuga o galuega sa faatulaga mo lenei aso Fono. E fia faaleo foi le agaga o le faafetai i le paia o le Palemene ona o lo outou onosai ma le faapalepale i le taumafaiga o le tatou galuega. O lea ua tau manuia ona o le tatou galulue faatasi. E amata mai lava i le aso fono ananafi i le afua mai i le faatautoga o Le Ao o le Malo i le taeao, seia oo ina ua tolopo ua afiafi. Malo le usufono malo le onosai.

E faafetai atu foi Samoa i lau tapuaiga, o lea ua iu ma le manuia le Fonotaga a lau Palemene i le afua mai ananafi seia aulia mai lenei aso ona o lau tapuaiga. Faafetai tatalo, faafetai tapuai. Pe afai ua sala se gagana a lau Palemene, ia alofa ma faamagalo. O le tatalo ia i ai pea le filemu ma faamanuiaga a le Atua i si o tatou atunuu.

E momoli atu foi le faafetai i le tapuaiga a Ofisa Sili o Pulega o Matagaluega ma Faalapotopotoga Tumaoti a lo tatou Malo. Malo i lo outou lavapapale ma le onosai, ia saga faamanuia le Atua i lo outou valaauina. E i ai le manatu, ua tataua ona fai se tatou malologa.

Ae tatou te le i malolo, ou te talosaga atu i lau Afioga i le Sui Fofoga Fetalai se i e saunia se tatalo e faai ai le tatou Fono.

Na tolopo Taulumaga a le Fono Aoao Faitulafono i le itula e 12:20 i le aoauli seia aulia le Aso Lua, 20 Tesema 2022 i le itula e 9:30 i le taeao.